

漢書門
類號函架冊
五〇九七八

內閣文庫
漢書
四四一八
函架冊號

内閣文庫
番號 漢 4418
冊數 50 (24)
函號 281 1

0 1 2 3 4 5 6 7 8 9 cm

Kodak Gray Scale
A 1 2 3 4 5 6 M 8 9 10 11 12 13 14 15 B 17 18 19
© Kodak, 2007 TM: Kodak

G Y M



綴じ部(喉部分)の文字など開きが不鮮明な箇所あり

唐書卷八十一 三宗諸子列傳第六 宋宋祁撰

皇明朝列大夫國子監祭酒臣蕭良有

承直郎 司業臣葉向高等奉

勅重較刊

皇明朝列大夫國子監祭酒臣吳士元

承德郎司業仍加俸一級臣黃錦等奉

高宗八子後宮劉生忠鄭生孝楊生上金蕭淑妃生系

節武后生弘賢中宗皇帝睿宗皇帝

燕王忠字正本帝始為太子而忠生宴宮中俄而太宗

臨幸詔宮臣曰朕始有孫欲共為樂酒酣帝起舞以屬

羣臣在位皆舞賚賜有差貞觀二十年始王陳永徽初

拜雍州牧王皇后無子后舅柳奭說后以忠母微立之

必親已后然之請於帝又爽與褚遂良韓瑗長孫無忌于志寧等繼請遂立為皇太子后廢武后子弘甫三歲許敬宗希后旨建言國有正嫡太子宜同漢劉彊故事帝召見敬宗曰立嫡若何對曰正本則萬事治太子國本也且東宮所出微今知有正嫡不自安竊位而不自安非社稷計帝曰忠固自讓敬宗曰能為大伯不亦善乎於是降封梁王梁州都督賜甲第實封戶二千物二萬段俄徙房州刺史忠變懼不聊生至衣婦人衣備刺客數有妖夢嘗自占事露廢為庶人囚黔州承乾故宅麟德初宦者王伏勝得罪於武后敬宗乃誣忠及上官儀與伏勝謀反賜死年二十二無子明年太子弘表請收葬許之神龍初追封又贈太尉揚州大都督

原悼王孝永徽元年始王許與杞雍二王同封早薨神龍初追封及諡

澤王上金始王杞永徽三年遙領益州大都督歷鄜壽二州刺史武后疾其母故有司誣奏削封邑徙置澧州久之後陽若可喜者表祀王上金鄱陽王素節聽朝集義陽宣城二公主各增夫秩由是上金為沔州刺史素節岳州刺史然卒不朝高宗崩詔上金素節二公主赴哀文明元年徙王畢又徙王澤歷五州刺史載初中武

承嗣諷周興誣上金素節謀反召繫御史獄上金聞素節已被殺卽雉經七子金流死顯州神龍初追還官爵以子義珣嗣王義珣始被謫匿身為傭保而嗣許王瓌利其爵邑告義珣假冒復流嶺外開元初以素節子璆為後而王真公主表義珣實上金子乃奪璆爵復使義珣嗣王拜率更令薨子湏嗣許王素節始王雍授雍州牧方羈州卽誦書日千言師事徐齊暉淬勉自彊帝愛之轉歧州刺史更王郇母被譖死出素節為申州刺史乾封初詔素節病無入朝而實不病乃著忠孝論自明倉曹參軍張柬之以聞欲帝省其誣武后滋不悅坐受賊降王鄱陽削封戶什七徙置袁州錮終身儀鳳三年為岳州刺史更王葛又徙王歷三州刺史與上金同追逮赴都道聞遭喪哭者謂左右曰病死何可得而須哭哉至龍門驛被縊年四十三葬以庶人禮子瑛等九人金誅惟琳瓌璆欽古尚幼長囚雷州中宗復位追故封又增開府儀同三司許州刺史陪葬乾陵詔瓌嗣王實封戶四百開元初封琳為嗣越王璆嗣澤王琳至右監門衛將軍子隨封夔國公瓌為衛尉卿以抑上金子不得封貶鄂州別駕因詔外繼嗣王者皆歸宗乃以嗣江王禕為信安王嗣蜀王禕為廣漢王嗣密王徹為濮陽

王嗣曹王臻為濟國公嗣趙王瑀為中山王武陽王繼
宗為澧國公權宗遷太子詹事薨贈蜀郡大都督二子
解需皆幼以璆子益嗣天寶十四載解始襲封王

璆初封嗣澤王降為郢國公宮宗正光祿卿進封襲信
王初張九齡撰龍池頌刊石興慶宮宗子以為不稱盛
德更命璆為頌建花萼樓北天寶初復拜宗正卿性友
弟聰敏宗子有一善無不薦延故宗室在省闈者多璆
所啓薨贈江陵郡大都督三子謙為郢國公梓州刺史
巽汝南郡公欽古封巴國公子賁嗣

孝敬皇帝弘永徽六年始王代與潞王同封顯慶元年

立為皇太子受春秋左氏於率更令郭瑜至楚世子商
臣弒其君喟而廢卷曰聖人垂訓何書此邪瑜曰孔子
作春秋善惡必書褒善以勸貶惡以誡故商臣之罪雖
千載猶不得滅弘曰然所不忍聞願讀它書瑜拜曰里
名勝母曾子不入殿下齋孝天資黜凶悖之迹不存視
聽臣聞安王治民莫善於禮故孔子稱不學禮無以立
請改受禮太子曰善四年加元服又命賓客許敬宗右
庶子許圜師中書侍郎上官儀中舍人楊思儉即文思
殿摘采古今文章號搖山玉彩凡五百篇書奏帝賜物
三萬段餘臣賜有差又詔五日一赴光順門決事總章

元年釋采國學請贈顏回爲太子少師曾參太子少保制可會有司以征遼士亡命及亡命不卽首者身殊死家屬沒官弘諫以爲士遇病不及期或被略若溺壓死而軍法不因戰亡則同隊悉坐法家曰亡命而家屬與真亡者同沒傳曰與殺不辜寧失不經臣請條別其科無使淪胥詔可帝幸東都詔監國時關中饑弘視廩下兵食有榆皮蓬實者悄然命家令寺給米義陽宣城二公主以母故幽掖廷四十不嫁弘聞胎惻建請下降武后怒卽以當上衛士配之由是失愛又請以同州沙苑分假貧民會納妃裴而有司奏費用白鴈適苑中獲之帝喜曰漢獲朱鴈爲樂府歌今得白鴈爲婚贊婚乃人倫首我則無慙禮畢曲赦岐州帝嘗語侍臣弘仁孝賓禮大臣未嘗有過而后將騁志弘奏請數拂旨上元二年從幸合璧宮遇醜薨年二十四天下莫不痛之詔曰太子嬰沈瘵朕須其痊復將遜于位弘性仁厚旣承命因感結疾日以加宜申徃命諡爲孝敬皇帝葬緱氏墓號恭陵制度盡用天子禮百官從權制三十六日釋服帝自製睿德紀刻石陵側營陵費鉅億人馱苦之投石傷所部官司至相率亡去妃薨諡哀皇后無子永昌初以楚王隆基嗣中宗立詔以主祔太廟號義宗開元中

有司奏孝敬皇帝宜建廟東都以謚名廟詔可於是罷
義宗號妃卽裴居道女有婦德而居道以妃故拜內史
納言歷太子少保翼國公爲酷吏所陷下獄死

章懷太子賢字明允容止端重少爲帝愛甫數歲讀書
一覽輒不忘至論語賢賢易色一再誦之帝問故對曰
性實愛此帝語李世勣稱其夙敏始王潞歷幽州都督
雍州牧徙王沛紮進揚州大都督右衛大將軍更名德
徙王雍仍領雍州牧涼州大都督實封千戶上元年復
名賢是時皇太子薨其六月立賢爲皇太子俄詔監國
賢於處決尤明審朝廷稱焉帝手勅褒賜賢又詔集諸

儒左庶子張大安洗馬劉訥言洛州司戶參軍格希玄
學士許叔牙成玄一史藏諸周寶寧等共注范曄後漢
書書奏帝優賜段物數萬時正諫大夫明崇儼以左道
爲武后所信崇儼言英王類太宗而相王貴賢聞惡之
宮人或傳賢乃后姊韓國夫人所生賢益疑而后撰少
陽政範孝子傳賜賢數以書讓勒愈不安調露中天子
在東都崇儼爲盜所殺后疑出賢謀遣人發太子陰事
詔薛元超裴炎高智周雜治之獲甲數百首於東宮帝
素愛賢薄其罪后曰賢懷逆大義滅親不可赦乃廢爲
庶人焚甲天津橋貶大安普州刺史流訥言於振州坐

徙者十餘人開耀元年徙賢巴州武后得政詔左金吾將軍丘神勣檢衛賢第迫令自殺年三十四后舉哀顯福門貶神勣豐州刺史追復舊王神龍初贈司徒遣使迎喪陪葬乾陵睿宗立追贈皇太子及謚三子光順守禮守義光順爲樂安王徙義豐被誅守義爲犍爲王徙封桂陽薨先天中追封光順莒王守義畢王

守禮嗣王始名光仁授太子洗馬武后革命畏疾宗室而守禮以父得罪與睿宗諸子閉處宮中十餘年睿宗封相王許出外邸於是守禮等始居外改司議郎中宗卽位復故封拜光祿卿實封戶五百唐隆元年進封邠

王睿宗立兼檢校左金吾衛大將軍出爲幽州刺史遙兼單于大都護遷司空開元初繁爲州刺史時寧申岐薛王同爲刺史皆擇僚首持綱紀守禮惟弋獵酣樂不領事故源乾曜袁嘉祚潘好禮皆爲邠府長史州佐督檢之後還諸王京師守禮以外支爲王不甚才而多寵嬖子六十餘人無可稱者常負息錢數百萬或勸少治居產守禮曰豈天子兄無葬者邪諸王每白上以爲歡岐王嘗奏守禮知雨暘帝問故答曰臣無它當天后時太子被罪臣幽宮中歲被勅杖凡四三繁創痕膚前雨則沈懣霽則佳以此知之因泣下帝爲惻然薨年七十

贈八尉子承宏承寧承案可記者

承宏爵廣武王坐交非其人貶房州別駕還為宗正卿
廣德元年吐蕃入京師天子如陝虜宰相馬重英立承
宏為帝以翰林學士于可封霍瓌為宰相賊退詔放承
宏于華州死承寧封嗣邠王

承案燉煌王拜宗正卿與僕固懷恩使回紇和親即納
其女為妃封毗伽公主薨贈司空唐制嗣郡王加四品
階親王子服緋開元中張九齡奏寧薛及邠王三子為
王者賜紫餘皆服緋官不越六局即王府掾屬仍員外
置後從帝至蜀者皆服紫

中宗四子韋庶人生重潤後宮生重福重俊殤帝

懿德太子重潤本名重照避武后諱改焉帝為皇太子
時生東宮高宗喜甚乳月滿為大赦天下改元永淳是
歲立為皇太孫開府置官屬帝問吏部侍郎裴敬彝郎
中王方慶對曰禮有嫡子無嫡孫漢魏太子在子但封
王晉立愍懷子為皇太孫齊立文惠子為皇太孫皆居
東宮今有太子又立太孫於古無有帝曰自我作古若
何對曰禮君子抱孫不抱子孫可以為王父尸者昭穆
同也陛下肇建皇孫本支千億之慶帝說昭議官屬敬
彝等奏置師傅友文學祭酒左右長史東西曹掾主簿

管記司錄六曹等官加王府一級然卒不補將封嵩山
召太子赴東都以太孫留守京師中宗失位太孫府廢
貶庶人別囚之帝復位封邵王大足中張易之兄弟得
幸武后或譖重潤與其女弟永泰郡主及主壻竊議后
怒杖殺之年十九重潤秀容儀以孝愛稱誅不緣罪人
皆流涕神龍初追贈皇太子及諡陪葬乾陵號墓爲陵
贈主爲公主

譙王重福高宗時王唐昌郡徙封平恩長安末乃進王
神龍初韋庶人譖與張易之兄弟陷重潤貶濮州員外
刺史徙合均二州不領事景龍三年中宗親郊赦天下
十惡者咸宥流人得還重福不得歸自陳蒼生皆自新
而一子擯棄皇天平分固若此乎不報韋后得政詔左
屯衛大將軍趙承恩薛思簡以兵護守睿宗立徙集州
未行洛陽男子張靈均說重福曰大王居嫡長當爲天
子相王雖平大難安可越居大位昔漢誅諸呂乃東迎
代王今百官士庶皆願王來王若陰幸東都殺留守擁
兵西據陝徇河南河北天下可圖也重福又遣靈均與
其黨鄭愔計愔亦密招重福爲天子預尊睿宗爲皇季
叔重茂皇太弟制稱中元克復元年愔自署左丞相知
內外文武事以靈均爲右丞相天柱大將軍知出征事

其餘以次除署重福自均州與靈均乘驛趨東都會駢
馬裴異家洛陽令候異重福驚遽出欲劫左右屯營兵
至天津橋願從者數百人侍御史李邕遇之先馳至右
屯營呼曰燕王得罪先帝擅入都爲亂公等勉立功取
富貴稍稍閉皇城諸門以拒重福徇右營不能動趨左
掖門已闔怒縱火燒之左營兵寢逼衆遂潰重福走山
谷留守裴談總兵大索投漕渠死年三十一磔其屍帝
詔以三品禮葬

節愍太子重俊聖曆三年王義興神龍初王衛拜洛州
牧實封千戶俄領揚州大都督明年爲皇太子以太廟
喪殺冊禮詔在藩食封歲納東宮給事中盧粲上言太
子與列國同人封不可爲法詔罷之重俊性明果然少
法度旣楊璈武崇訓爲賓客二人馮貴寵無學術惟徇
馬蹴鞠相戲昵左庶子姚珽數上疏諍導右庶子平貞
慎又獻孝經議養德等傳太子納而不克用武三思挾
韋后勢將圖逆內忌太子而崇訓又三思子尚安樂公
主常教主辱重俊以非韋出言爲奴數請廢自爲皇太
女三年七月重俊恚忿遂率李多祚泊左羽林將軍李
恩冲李承況獨孤棹之沙吒忠義矯發左羽林及千騎
兵殺三思崇訓并其黨十餘人使左金吾大將軍成王

千里守宮城自率兵趨蕭章門斬關入索韋后安樂公主昭容上官所在后挾帝升玄武門宰相楊再思蘇瓌李嶠及宗楚客紀處訥統兵二千餘人守太極殿帝召右羽林將軍劉仁景等率留軍飛騎百人拒之多祚兵不得進帝據檻語千騎曰爾乃我爪牙忽爲亂能斬賊者有賞於是士倒戈斬多祚餘黨潰重俊亡入終南山欲奔突厥楚客遣果毅趙思慎追之重俊憇于野爲左右所殺詔殊首朝堂獻太廟并以告三思崇訓極睿宗立加贈諡陪葬定陵初重俊被害官屬莫敢視惟永和丞竇嘉勛號哭解衣裹其首時人義之楚客怒收付獄貶平興丞卒至是亦贈永和令重俊子宗暉景雲二年封湖陽郡王天寶中至太常員外卿薨

睿宗六子蕭明皇后生憲宮人柳生撫昭成皇后生玄宗皇帝崔孺人生範王德妃生業後宮生隆悌讓皇帝憲始王永平文明元年武后以睿宗爲皇帝故憲立爲皇太子睿宗降爲皇嗣更冊爲皇孫與諸王皆出閣開府置官屬長壽二年降王壽春與衡陽巴陵彭城三王同封復詔入閣中宗立改王蔡固辭不敢當唐隆元年進封宋睿宗將建東宮以憲嫡長又嘗爲太子而楚王有大功故久不定憲辭曰儲副天下公器時平

則先嫡國難則先功重社稷也使付授非宜海內失望
臣以死請因涕泣固讓時大臣亦言楚王有定社稷功
且聖庶抗嫡不宜更議帝嘉憲讓遂許之立楚王爲皇
太子以憲爲雍州牧揚州大都督太子太師實封至二
千戶賜甲第物段五千良馬二十奴婢十房上田三十
頃進尚書右僕射又兼司徒讓司徒更爲太子賓客時
太平公主有醜圖姚元崇宋璟白帝請出憲及申王成
義爲刺史以銷釋陰計乃以司徒兼蒲州刺史進司空
玄宗旣討定蕭岑之難進憲位大尉增千戶固辭更授
開府儀同三司解太尉揚州大都督徙王寧又兼太僕
卿開元十四年表解卿久之復爲太尉歷澤岐涇三州
刺史累封至五千五百戶二十九年薨初帝五子列第
東都積善坊號五王子宅及賜第上都隆慶坊亦號五
王宅玄宗爲太子嘗製大衾長枕將與諸王共之睿宗
知喜甚及先天後盡以隆慶舊邸爲興慶宮而賜憲及
薛王第於勝業坊申岐二王居安興坊環列宮側天子
於宮西南置樓其西署曰花萼相輝之樓南曰勤政務
本之樓帝時時登之聞諸王作樂必亟召外樓與同榻
坐或就幸第賦詩燕嬉賜金帛侑歡諸王日朝側門旣
歸卽具樂縱飲擊毬鬪鷄馳鷹犬爲樂如是歲月不絕

所至輒中使勞賜相踵世謂天子友悌古無有者帝於
敦睦蓋天性然雖讒邪亂其間而卒無以搖時有鶴鶴
千數集麟德殿廷樹翔棲浹日左清道率府長史魏光
乘作頌以爲天子友悌之祥帝喜亦爲作頌憲尤謹畏
未嘗干政而與人交帝亦信重嘗以書賜憲等曰魏文
帝詩西山一何高高殊無極上有兩仙童不飲亦不
食賜我一丸藥光耀有五色服之四五日身體生羽翼
朕每言服藥而求羽翼寧如況弟天生之羽翼乎陳思
王之才足以經國絕其朝謁卒使憂死魏祚未終司馬
氏奪之豈神丸效耶虞舜至聖捨象傲以親九族九族
旣睦平章百姓今數千載天下歸善焉此朕廢寢忘食
所慕歎也頃因餘暇選仙錄得神方云餌之必壽今持
此藥願與兄弟共之偕至長齡永永無極也後申王等
相繼薨唯憲在帝親待愈益厚每生日必幸其第爲壽
往往留宿居常無日不賜遺尚食總監及四方所獻酒
酪異饌皆分餉之憲嘗請歲盡錄賜目付史官必數百
紙後有疾護醫將膳騎相望也僧崇一者療之少損帝
喜甚賜緋袍銀魚已而疾寔劇薨年六十三帝失聲號
慟左右皆泣下帝以憲實推天下有高世之行非大號
不稱乃追諡讓皇帝遣尚書左丞相裴耀卿太常卿韋

縉持節奉冊其子璉表陳憲宿素退讓不敢當大號制
不許及歛出天子服一稱詔右監門大將軍高力士以
手書直靈坐贈妃元爲恭皇后葬橋陵旁及葬勅中使
諭璉等送終之具使衆見之示以儉薄所司請如諸陵
設千味食內壙中監護使耀卿建言尚食料水陸十餘
種及馬牛驢犢麀鹿鵝鴨魚鴈體節之味并藥酒三十
名盛夏胎養不可多殺考求禮據無所憑依陛下每申
讓帝之志務存約素請蠲省折衷詔可既發引大雨有
詔慶王潭等涉途泥步送十里號其墓曰惠陵憲常從
帝按舞萬歲樓從複道上見衛士已食棄其餘實中帝
怒詔高力士杖殺之憲從容曰從複道上窺人之私恐
士不自安且失大體豈以性命輕於餘殮乎帝遽止謂
力士曰王於我可謂有急難也不然且誤殺士又涼州
獻新曲帝御便坐召諸王觀之憲曰曲雖佳然宮離而
不屬商亂而暴君卑逼下臣僭犯上發於忽微形於音
聲播之詠歌見於人事臣恐一日有播遷之禍帝默然
及安史亂世乃思憲審音云憲本名成器避昭成太后
諡與申王成義俱改今名憲子十九人其聞者璉嗣莊
琳瑀

璉眉宇秀整性謹潔善射帝愛之封汝陽王歷太僕卿

與賀知章褚庭誨梁涉等善薨贈太子太師嗣莊幼有
令名爲太子左諭德封濟陰王薨贈幽州大都督琳以
祕書監爲嗣寧王從天子幸蜀薨
瑀早有材望偉儀觀始封隴西郡公從帝幸蜀至河池
封漢中王山南西道防禦使乾元初寧國公主降回紇
詔瑀以特進太常卿持節冊拜回紇爲威遠可汗瑀亦
知音嘗早朝過永興里聞笛音顧左右曰是太常工乎
曰然它日識之曰何故卧吹笛工驚謝又聞康昆崙奏
琵琶曰琵琶聲多琵琶聲少是未可彈五十四絲大絃也樂
家以自下逆鼓曰琵琶自上順鼓曰琵琶云肅宗詔收羣臣

馬助戰瑀與魏少游等持不可帝怒貶蓬州長史薨贈

太子太師諡曰宣孫景儉

景儉字寬中及進士第彊記多聞善言古成敗王霸大
略高自負於士大夫無所屈王叔文等更譽之以爲管
仲諸葛亮比叔文敗景儉以母喪得不坐韋夏卿守東
都辟幕府實羣任中丞引爲監察御史羣貶景儉亦爲
江陵戶曹參軍累擢忠州刺史元和未入朝不見用復
爲澧州刺史素與元稹李紳善二人方在翰林言其才
及延英奉辭景儉自陳見抑遠穆宗憐之追詔爲倉部
員外郎不遣閱月拜諫議大夫性矜誕使酒縱氣語侵

宰相蕭俛段文昌訴于帝貶建州刺史禎得君爲之助
故還爲諫議大夫與馮宿楊嗣復溫造李肇等集史官
獨孤朗所景儉醉至中書慢罵宰相王播崔植杜元穎
更爲遜言厚謝乃去坐貶漳州刺史宿等皆逐矣未及
漳禎輔政改楚州刺史議者謂景儉辱丞相貶未至卽
遷非是禎懼改少府監悉還宿等景儉旣溼阨不得志
卒然其爲人輕財篤於義旣沒士悵悼之

惠莊太子撫本名成義初生武后以母賤欲不齒以示
浮屠萬回回詭曰此西土樹神宜兄弟后喜乃畜之垂
拱二年始王恒與衛趙二王同封俄改王衡陽睿宗立
進王申與岐薛二王同封紫微右衛金吾二大將軍實
封至千戶進司徒兼益州大都督四爲州刺史開元八
年停刺史復爲司徒薨冊書贈太子及謚陪葬橋陵撫
性寬裕儀貌瓌重無嗣詔以讓帝子珣嗣爲懷寧王徙
封同安薨天寶中復以讓帝子壽嗣

惠文太子範始名隆範玄宗立與薛王隆業避帝諱去
二名初王鄭改封衛俄降封巴陵進王岐爲太常卿并
州大都督左羽林大將軍從玄宗誅太平公主以功賜
封與薛王業並滿五千戶歷爲州刺史遷太子太傅開
元十四年薨冊書贈太子及謚陪葬橋陵帝哭之慟徹

常膳至案旬羣臣勉請乃復範好學工書愛儒士無貴
賤爲盡禮與閭朝隱劉延琦張諤鄭繇等善常飲酒賦
詩相娛樂又聚書畫皆世所珍者初隋亡禁內圖書湮
放唐興募訪稍稍復出藏祕府長安初張易之奏天下
善工潢治乃密使摹出殆不可辨竊其真藏于家旣誅
悉爲薛稷取去稷又敗範得之後卒爲火所焚駙馬都
尉裴虛已善識緯坐私與範游徙嶺南延琦貶雅州司
戶諤爲山在丞然帝於範無少間也謂左右曰兄弟情
天至於我豈有異哉趨競者彊相附我終不以爲纖介
時王毛仲等起賤微暴貴諸王見必加禮獨範接之自
如子瑾嗣落魄不飭名檢沈酒色歷太僕卿封河東王
暴薨贈太子少師天寶中復以薛王子略陽公珍爲嗣
岐王珍儀觀豐偉爲宗正員外卿與蔚州鎮將朱融善
融嘗言珍似上皇因有陰謀往語金吾將軍邢濟曰關
外寇近京師草草奈何濟曰我金吾天子押衙以死生
從安自脫融曰見嗣岐王無慮矣濟以聞肅宗詔廢珍
爲庶人賜死融黨皆誅擢濟爲桂管防禦使
惠宣太子業始王趙降封中山授都水使者徙彭城兼
陳州別駕進王薛爲羽林大將軍荊州大都督以好學
授祕書監開元初進太子少保卽拜太保案歷州刺史

初母早終從母賢妃鞠之八年迎賢妃外邸事之甚謹
其女弟淮陽涼國二公主亦早卒撫甥與已子均帝益
愛之嘗被疾帝自祝禱既瘳幸其第置酒賦詩爲初生
歡帝嘗不豫業妃弟內直郎韋賓與殿中監皇甫恂妄
言休咎事賓坐死恂貶錦州刺史妃恐降服待罪業亦
不敢入謁帝聞遽召之業伏殿下請罪帝趨就執其手
曰吾所猜于兄弟者天地共咎之遂復燕歡仍諭妃復
位俄進司徒二十二年業有疾帝憂之一昔容髮爲變
因假寢夢獲方寤而業少間邠王守禮等請以事付史
官及薨帝悲不能食冊書加贈及諭陪葬橋陵十一子
其聞者瑗瑒瑒帝後追思業引見瑒等仇之乃下詔共
賜實封千戶瑒爲樂安王瑒瑒瑒王宗正卿瑒爲嗣薛
王歷鴻臚卿天寶中瑒舅韋堅爲李林甫所構坐貶夷
陵別駕徙置夜郎南浦及安祿山亂乃還京師
曾孫知柔嗣王再爲宗正卿久之擢京兆尹始鄭白渠
梗壅民不得歲知柔調三輔治復舊道灌浸如約遂無
旱虞民詣闕請立石紀功知柔固讓得止加累檢校司
徒同中書門下平章事又詔營緝太廟判度支克諸道
鹽鐵轉運使昭宗出莎城獨知柔從乘輿器用庖頓皆
主之大細畢給性儉約雖位通顯無居第未幾出拜清

海軍節度使在鎮廉潔貢獻時入進檢校太傅兼侍中
仕凡四紀常為宗室冠卒于鎮

隋王隆悌始封汝南王早薨睿宗追王贈荊州大都督
爵不傳

贊曰中宗失道身為母所廢妻所弑而四子皆不得其
死嗣亦不傳殆天穢其德而絕之何耶彼固自絕于天
云爾睿宗有聖子一受命一追帝三贈太子天與之報
福流無窮盛歟

唐書卷八十一終

唐書卷八十二 十一宗諸子列傳第七 宋宋祁撰

皇明朝列大夫國子監祭酒臣蕭良有
承直郎司業臣葉向高等奉

勅重較刊
皇明朝列大夫國子監祭酒臣吳士元

古重修
承德郎司業仍加俸一級臣黃錦等奉

玄宗三十子劉華妃生琮第六子琬第十二子璿趙麗
妃生瑛元獻皇后生肅宗皇帝錢妃生琰皇甫德儀生
瑤劉才人生琚武惠妃生一第十五子敏第十八子瑁
第二十一子琦高婕妤生璪郭順儀生璘柳婕妤生玢
鍾美人生環盧美人生理閻才人生玼王美人生珪陳
才人生珙鄭才人生璿武賢儀生璿第三十子璿餘七

子天母氏失傳奉天皇帝琮景雲元年王許昌郡與真
定王同封先天元年進王郟與郟王同封開元四年領
安西大都護安撫河東關內隴右諸蕃大使十三年徙
王慶與忠棣榮光儀頴永壽延盛濟十一王同封十五
年與十王金領節度不出閤琮以涼州都督兼河西諸
軍節度大使天寶元年改節河東十載薨贈太子諡靖
德肅宗立詔曰靖德太子琮親則朕兄睿愨聰明朕昔
踐儲極顧誠非次君父有命不敢違永言懇讓不克如
素宜進謚奉天皇帝妃寶為恭應皇后詔尚書右僕射
裴冕持節改葬羣臣素服臨送達禮門帝御門哭以過
喪墓號齊陵無子以太子瑛子倅嗣王琮始名嗣直太
子嗣謙棣王嗣真鄂王嗣初靖恭太子嗣玄開元十三
年更名曰潭曰鴻曰洽曰涓曰滉後十年改今名
太子瑛始王真定進王郟開元三年立為皇太子七年
詔太子諸王入國學行齒胄禮太常擇日謁孔子太子
獻詔右散騎常侍褚無量執經羣臣學官諸生以差賜
帛明年瑛加元服見太廟十六年詔九品官息女可配
太子者有司採闕待進止以太常少卿薛綰女為妃帝
種麥苑中瑛諸王侍登帝曰是將薦宗廟故親之亦欲
若等知稼穡之難因分賜侍臣曰春秋書無麥禾古所

甚重比詔使者閱田畝所對不以實故朕自時以觀其
成云初瑛母以倡進善歌舞帝在潞得幸及卽位擢妃
父元禮兄常奴皆至大官鄂光二王母亦帝爲臨淄王
時以色選及武惠妃寵幸傾後宮生壽王愛與諸子絕
等而太子二王以母失職頗快快惠妃女咸宜公主壻
揚洄揣妃旨伺太子短譁爲醜語惠妃訴于帝且泣帝
大怒召宰相議廢之中書令張九齡諫曰太子諸王日
受聖訓天下共慶陛下享國久子孫蕃衍柰何一日棄
三子昔晉獻公惑嬖姬之讒申生憂死國乃大亂漢武
帝信江克巫蠱禍及太子京師喋血晉惠帝有賢子賈
后譖之乃至喪亡隋文帝聽后言廢太子勇遂失天下
今太子無過二王賢父子之道天性也雖有失尚當掩
之惟陛下裁赦帝默然太子得不廢俄而九齡罷李林
甫專國數稱壽王美以摠妃意妃果德之二十五年洄
復構瑛瑤瑤與妃之兄薛鏞異謀惠妃使人詭召太子
二王曰宮中有賊請介以入太子從之妃白帝曰太子
二王謀反甲而來帝使中人視之如言遽召宰相林甫
議答曰陛下家事非臣所宜豫帝意決乃詔太子瑛鄂
王瑤光王瑒同惡均罪並廢爲庶人鏞賜死瑛瑤瑒尋
遇害天下冤之號三庶人歲中惠妃數見庶人爲祟因

大病夜召巫祈之請改葬且射行刑者瘞之訖不解妃
死崇亡寶應元年詔贈瑛皇太子瑤等復王瑛子五人
儼伸倩侏備瑛之廢帝使慶王畜儼等爲子儼封新平
郡王伸平原郡王侏嗣慶王備太僕卿倩失傳

棣王琰開元二年始王鄆與鄂鄆二王同封後徙王棣
領大原牧太原以北諸軍節度大使天寶初爲武威郡
都督經略節度河西隴右會妃韋以過置別室而二孺
人爭寵不平求巫者密置符琰履中以求媚讎人告琰
厭魅上帝伺其朝使人取履視之信帝怒責琰琰頓首
謝曰臣罪宜死然臣與婦不相見二年有二孺人爭長

臣恐此三人爲之及推果驗然帝猶疑琰怒未置太子
以下皆爲請乃因於鷹狗坊以憂薨妃緡之女無子還
本宗琰凡五十五子得王者四人僎王汝南郡僑宜都
俊濟南俊順化僚太僕卿俠國子祭酒仁殿中監俊祕
書監寶應元年詔復琰王爵

鄂王瑤旣封遙領幽州都督河北節度大使開元二十
三年與榮光儀賴朮壽延盛濟信義十一王金授開府
儀同三司實封二千戶詔詣東宮尚書省上日百官集
送有司供張設樂是日悉拜王府官屬然未有府也而
選任冒濫時不以爲榮

靖恭太子琬始王郵徙王榮爲京兆牧領隴右節度大
使又詔親巡按隴右選關內河東飛騎五萬防盛秋累
兼單于安北大都督安祿山反詔琬爲征討元帥募河
隴兵屯陝以高仙芝副之會慶琬風格秀整有素望中
外倚之及薨莫不爲國悵恨詔加贈諡琬男女五十八
人得王者三人俯王濟陰郡偕北平倩陳留僚衛尉卿
儼祕書監佩鴻臚卿

光王琚開元十三年始王與儀賴未壽延盛濟七王同
封俄領廣州都督勇力善騎射帝愛之與鄂王同居友
睦甚皆篤學旣廢無嗣初琚名滸儀王滸賴王滸未王
澤壽王清延王洄盛王沐濟王溢信王沔義王滸陳王
沘豐王澄恒王惠涼王澁汴王滔至二十三年詔悉改
今名

夏悼王一生詔秀以母寵故鍾愛命之曰一未免懷薨
追爵及謚時帝在東都故葬龍門東岑欲宮中望見云
儀王遂旣封授河南牧薨贈太傅子侁王鍾陵郡健廣
陵
穎王璩喜讀書好文辭開元十五年遙領安東都護安
祿山反詔領劔南節度大使以楊國忠爲之副帝西出
令御史大夫魏方進爲置頓使移書劔南屬郡託璩之

藩大設備侍璈先卽鎮更以蜀郡長史崔圓爲副璈濟
江舟中以綵席藉步命徹之曰此可寢柰何踐之璈之
出遽不及受節司馬史賁請建大槩蒙油囊先驅以威
道路璈笑曰旣爲真王矣安用假節爲將至成都崔圓
迎拜馬前璈不爲禮圓銜之璈視事再踰月人便其寬
圓奏罷居內宅乃詔宣慰肅宗於彭原從還京師建中
四年薨年六十六子伸爲滎陽王僞高邑王倪楚國公
傳夔國公

懷思王敏貌豐秀若圖畫帝愛之甫晬薨追爵及謚祔
葬敬陵

永王璘少失母肅宗自養視之長聰敏好學貌陋甚不
能正視旣封領荊州大都督安祿山反帝至扶風詔璘
卽日赴鎮俄又領山南江西嶺南黔中四道節度使以
少府監竇昭爲副璘至江陵募士得數萬補署郎官御
史時江淮租賦鉅億萬在所山委璘生宮中於事不通
曉見富且強遂有闕江左意以薛鏐李臺卿韋子春劉
巨鱗蔡駟爲謀王肅宗聞之詔璘還覲上皇于蜀璘不
從其子襄成王陽剛鷲之謀亦樂亂勸璘取金陵卽引
舟師東下甲士五千趨廣陵以渾惟明李廣琛高仙琦
爲將然未敢顯言取江左也會吳郡採訪使李希言平

牒璘璘因發怒曰寡人上皇子皇帝弟地尊禮絕今希
言乃平牒抗威落筆署字何邪乃使惟明襲希言而令
廣琛趨廣陵攻採訪使李成式璘至當塗希言已屯丹
陽遣將元景曜等拒戰不勝降於璘江淮震動明年肅
宗遣宦者啖廷瑤等與成式謀招諭之時河南招討判
官李銑在廣陵有兵千餘廷瑤邀銑屯楊子成式又遣
裴戎以廣陵卒三千戍伊婁張旗幟大閱士璘與傷
登陴望之有懼色廣琛知事不集謂諸將曰與公等從
王豈欲反邪上皇播遷道路不通而諸子無賢於王者
如總江淮銳兵長驅雍洛大功可成今乃不然使吾等
名絳叛逆如後世何衆許諾遂割臂盟於是惟明奔江
寧馮季康奔白沙廣琛以兵六千奔廣陵璘使琦追躡
之廣琛曰我德王故不忍決戰逃命歸國耳若逼我且
決死追者止乃免是夜銑陣江北夜然京華人執二炬
景亂水中覘者以倍告璘軍亦舉火應之璘疑王師已
濟攜兒女及麾下遁去遲明覺其紿復入城具舟楫使
傷驅衆趨晉陵謀者告曰王走矣成式以兵進先鋒至
新豐璘使傷仙琦逆擊之銑合勢張左右翼射傷中肩
軍遂敗仙琦與璘奔鄱陽司馬閉城拒璘怒焚城門入
之收庫兵掠餘千將南走嶺外皇甫侁兵追及之戰大

唐書卷八十二 列傳 第七
庾嶺璘中矢被執旣殺之傷爲亂兵所害仙琦逃去璘未敗時上皇下詔降爲庶人徙置房陵及死旣送妻子至蜀上皇傷悼久之肅宗以少所自鞠不宣其罪謂左右曰皇甫旣執吾弟不送之蜀而擅殺之何邪由是不復用薛鏐等皆伏誅子儼爲餘姚王偵莒國公儼郟國公伶儀並國子祭酒

壽王瑁母惠妃頻姪不育及瑁生寧王請養邸中元妃自乳之名爲已子故封比諸王最後開元十五年遙領益州大都督初帝以永王等尚幼詔不入謁瑁七歲請與諸兄衆謝拜舞有儀矩帝異之寧王薨請制服以報私恩詔可大曆十年薨贈大傅子王者三人儼王德陽郡休濟陽郡偃廣陽郡伉薛國公傑國子祭酒

延王玢母尚書左丞範之孫帝重其名家而玢亦仁愛有學旣封遙領安西大都護帝入蜀玢凡三十六子不忍棄故徐進數日見行在所帝怒漢中王瑀申救得解聽歸靈武興元元年薨子傳王彭城郡徙平陽掠魯國公偃荆國公伉太僕卿

盛宣王琦旣封領揚州大都督帝之西詔爲廣陵大都督淮宣江東河南節度大使以劉彙爲副李成式爲副大使琦不行廣德二年薨贈太傅子儼封真定王佩武

都王俗徐國公係許國公

濟王環逸其薨年子僚王永嘉郡俛平樂郡

信王璵開元二十一年始王與義陳豐恒涼汴六王同

封子修封新安王侗晉陵王

義王玘與信王金失薨年子儀爲舞陽王僂高密王

陳王珪二十一子得王者三人倫王安南郡佗臨淮佞

安陽

豐王珙已封爲左衛大將軍帝至普安授珙武威都督

河西隴右安西北庭節度大使以隴西太守鄧景山爲

副珙不行廣德初吐蕃入京師代宗幸陝將軍王懷忠

閉苑門以五百騎劫諸王西迎虜遇郭子儀懷忠曰上

東遷宗社無主今僕奉諸王西奔以係天下望公爲元

帥惟有廢置子儀未對珙輒曰公何如司馬王延昌質

責珙曰上雖蒙塵未有失德王爲藩翰安得狂悖之言

子儀亦讓之卽護送行在所帝赦不責珙語不遜羣臣

恐其亂請除之乃賜死子佻爲齊安王

恒王瑱好方士常服道士服從帝幸蜀還代宗時薨

涼王璿母高平王重規之女宮中號小武妃者璿薨代

宗時子佻爲瀘陽郡王

沐哀王璿於諸子爲最少初封纔數歲容貌秀澈有成

人風帝愛之開元二十三年授右千牛衛大將軍明年
薨唐制親王封戶八百增至千公主三百長公主止六
百高宗時沛英豫三王太平公主武后所生戶始踰制
垂拱中太平至千二百戶聖曆初相王太平皆三千壽
春等五王各三百神龍初相王太平至五千衛王三千
溫王二千壽春等王皆七百嗣雍衡陽臨淄巴陵中山
王五百安樂公主二千長寧千五百宣城宣城宣安各
千相王女爲縣主各三百相王增至七千安樂三千長
寧二千五百宣城以下二千相王太平長寧安樂以七
丁爲限雖水旱不蠲以國租庸滿之中宗遺詔雍壽春
王進爲親王戶千開元後天子敦睦兄弟故寧王戶至
五千五百岐薛五千申王以外家微戶四千邠王千八
百帝妹戶千中宗諸女如之通以三丁爲限及皇子封
王戶二千公主五百咸宜公主以母惠妃故封至千自
是諸公主例千戶止初文德皇后崩晉王最幼太宗憐
之不使出閣豫王亦以武后少子不出閣嗣聖初卽帝
位及降封相王乃出閣中宗時譙王失愛遷外藩溫王
年十七猶居宮中遂立爲帝開元後皇子幼多居禁內
旣長詔附苑城爲大宮分院而處號十王宅所謂慶忠
棣鄂榮光儀頴永延盛濟等王以十舉全數也中人押

之就來城參天子起居家令每進膳引詞學士入授書
謂之侍讀壽信義陳豐恒涼七王就封亦居十宅鄂光
廢死忠王立為太子慶棣繼薨唯榮儀十四王居院而
府幕列於外坊歲時通名起居既又諸孫多則於宅外
更置百孫院天子歲幸華清宮又置十王百孫院于宮
側宮人每院四百餘百孫院亦三四十人禁中置維城
庫以給諸王月奉諸孫納妃嫁女就十王宅太子不居
東宮處乘輿所幸別院太子親王公主婚嫁金供帳於
崇仁之禮院此承平制云

肅宗十四子章敬皇后生代宗皇帝宮人孫生係張生
倓王生似陳婕妤生僅韋妃生側張美人生倓後宮生
榮裴昭儀生橫段婕妤生倓崔妃生德張皇后生召倓
後宮生倓

越王係生開元時玄宗末年悉王太子子故係王南陽
郡帝即位至德二載十二月進王趙與彭充涇鄆襄杞
召興定九王同封乾元二年九節度兵潰河北朝廷震
駭乃以李光弼代郭子儀總兵關東而光弼請賢王為
帥於是詔係克天下兵馬元帥而光弼以司空兼侍中
薊國公副知節度行營事係留京師史思明陷洛陽係
請行不聽明年徙王越帝寢疾皇太子監國張皇后與

中人李輔國有隙因召太子入謂曰輔國典禁軍用事
久四方詔令皆出其口矯天子制逼徙聖皇天下側目
今上疾彌留輔國常怏怏忌吾與汝又程元振陰結黃
門圖不軌若釋不誅禍不移頃太子泣曰此二人者陛
下勲舊而上體不豫重以此事得無震驚乎願出外徐
計之后曰是難與共事者乃召係曰汝能行此乎係許
諾卽遣內謁者監段恒俊選材勇宦者二百人授甲長
生殿以帝命召太子元振以告輔國乃相與勒兵凌霄
門迎太子以難告太子曰上疾亟吾可懼死不赴乎元
振曰赴則及禍乃以兵護太子止飛龍殿勒兵夜入三
殿收係及恒俊等百餘人繫之幽后別殿后及係皆爲
輔國所害係二子建王武威郡道興道逾齊國公
承天皇帝倓始正建寧英毅有才略善騎射祿山亂典
親兵扈車駕度渭百姓遮道留太子太子使喻曰至尊
播遷吾可以違左心乎倓進說曰逆胡亂常四海崩分
不因人情圖興復一欲從上入蜀而散關以東非國家
有夫大孝莫若安社稷殿下當募豪傑趣河西收牧馬
今防邊屯士不下十萬而光弼子儀全軍在河朔與謀
興復策之上者廣平王亦贊之於是議定太子北過渭
兵仗濫惡士氣崩沮日數十戰倓以驍騎數百從每接

戰常身先血殷袂不告也太子或過時未食倓輒涕泗不自勝三軍皆屬目至靈武太子卽帝位議以倓爲天下兵馬元帥左右固請廣平王帝曰廣平旣冢嗣安用元帥答曰太子從曰撫軍守曰監國元帥撫軍也莫宜於廣平王帝從之更詔倓典親軍以李輔國爲府司馬時張良娣有寵與輔國交構欲以動皇嗣者倓忠謇數爲帝言之由是爲良娣輔國所譖妄曰倓恨不總兵鬱鬱有異志帝惑偏語賜倓死俄悔悟明年廣平王收二京使李泌獻捷泌與帝雅素從容語倓事帝改容曰倓於艱難時實自有力爲細人間聞欲害其兄我計社稷割愛而爲之所泌曰爾時臣在河西知其詳廣平於兄弟篤睦至今言建寧則嗚咽不自已陛下此言得之讒口耳帝泣下曰事已爾未耐何必曰陛下嘗聞黃臺瓜乎高宗有八子天后所生者四人自爲行而睿宗最幼長曰弘爲太子仁明孝友后方圖臨朝鴆殺之而立次子賢賢日憂惕每待上不敢有言乃作樂章使工歌之欲以感悟上及后其曰種瓜黃臺下瓜熟子離離一摘使瓜好再摘令瓜稀三摘尚云可四摘抱蔓歸而賢終爲后所斥死黔中陛下今一摘矣慎無再帝愕然曰公安得是言是時廣平有大功亦爲后所構故泌因對及

之廣平遂安及卽位追贈倓齊王大曆三年有詔以倓當艱難時首定大謀排衆議於中興有功乃進諡承天皇帝以與信公主季女張爲恭順皇后冥配焉葬順陵祔主奉天皇帝廟同殿異室云初李泌請加贈倓代宗曰倓性忠孝而困於讒追帝之若何答曰開元中上皇兄弟皆贈太子帝曰是特祖宗友愛耳豈若倓有功乎於是追帝號遣使迎喪彭原旣至城門喪輜不動帝謂泌曰豈有恨邪卿往祭之以白朕意且卿及知倓艱難定策者泌爲挽詞二解追述倓志命挽士唱泌因進酌輜乃行觀者皆爲垂泣

衛王佖始王西平蚤薨寶應元年五月與鄆王同追封彭王儻始王新城進封彭史思明陷河洛人心震騷羣臣請以諸王臨統方鎮兵遙相維壓於是詔僅克河西節度兗王北庭涇王隴右杞王陝西興王鳳翔金爲大使是歲僅薨子鎮爲常山郡王

兗王儻始王潁川進王兗寶應元年薨

涇王佺始王東陽進王涇興元元年薨

鄆王榮始王靈昌蚤薨追封

襄王儻至德二載始王與杞召興定四王同封貞元七年薨子宣爲伊吾郡王宗樂安王宣裔孫煜

煇性謹柔材無過人者光啓二年田令孜逼僖宗幸興元邠寧節度使朱玫以五千騎追乘輿不及煇以疾不能從玫劫之駐鳳翔得臺省官百餘乃脅宰相蕭遘等率羣臣盟石鼻驛奉煇爲嗣襄王監軍國事已還京師卽封拜官屬初遘執不可於是罷遘而玫自爲侍中號令已出以裴澈爲門下侍郎鄭昌圖中書侍郎皆平章事遣柳陟等十餘人分諭天下嗣襄王所以監國意皆得進官玫又脅太子太師裴璩等奉牋勸進煇五讓乃卽位改元建貞尊僖宗爲太上天皇聖帝河中節度使王重榮率諸藩貢奉歸者十八九而蔡州秦宗權自僭號惟太原李克用不從時帝遣使喻重榮克用故二人聽命樞密使楊復恭等傳檄三輔募能斬玫者以邠寧節度畀之其僞將王行瑜自鳳州入京師殺玫而煇與澈昌圖并官屬奔東渭橋重榮給使迎之煇與官屬別且泣曰朕見重榮當令備所服逐公等至蒲執殺之因械澈等于獄誅殺僞官因煇首至行在所煇卽僞位凡九月敗始煇首至羣臣白帝御輿元南門受之百官稱賀太常博士殷盈孫奏言禮公族有罪有司曰某之罪在大辟君曰赦之如是者三走出致刑焉君爲素服不舉者三日今煇皇族以不能固節迫脅至此宜廢爲庶

人絕屬籍葬以庶人禮大捷之慶須朱玫首至乃賀詔可

杞王倓貞元十四年薨

召王僖元和元年薨

恭懿太子佖始封興王土元元年薨佖生后方專愛帝最憐之后數撼儲嫡欲以佖嗣會薨計塞是夕帝及后夢佖辭決流涕去帝鯁悵故冊贈皇太子

定王侗寶應初薨

代宗二十子睿真皇后生德宗皇帝崔妃生邈貞懿皇后生迥十七王史亡其母之氏位

昭靖太子邈好學以賢聞上元二年始王益昌帝即位寶應元年進王鄭與韓王同封淄青牙將李懷王逐其帥侯希逸詔邈為平盧淄青節度大使以懷王知留後大曆初代皇太子為天下兵馬元帥八年薨遂罷元帥府

均王遐早薨貞元八年追封

睦王述大曆十年田承嗣不臣而昭靖天無疆王帝乃悉王諸子領諸鎮軍威天下於是述為睦王領嶺南節度逾郴王渭北鄜坊節度迥韓王汴宋節度造忻王昭義節度皆為大使連為恩王遘鄜王暹韶王遇端王

適循王通恭王逵原王逸雅王並開府儀同三司然不出閣德宗建中初周天下訪太后所在述於諸王最長故拜奉迎太后使以工部尚書喬琳副之貞元七年薨丹王逾始王郴建中四年與簡王同徙封元和十五年薨

恩王連元和十二年薨

韓王迥始王延慶郡以母寵故與鄭王先徙封貞元十二年薨

簡王邁始王鄜徙封簡元和四年薨

益王迺大曆十四年始王亡薨年

隋王迅興元元年薨

荆王選蚤薨建中二年追王

蜀王遡本名遂大曆十四年始王建中二年改今名

忻王造元和六年薨

韶王暹貞元十二年薨

嘉王運貞元十七年薨

端王遇貞元七年薨

循王適亡薨年

恭王通亡薨年

原王逵大和六年薨

雅王逸貞元十五年薨

德宗十一子昭德皇后生順宗皇帝帝取昭靖太子子
誼爲第二子又取順宗子諒爲第六子餘八王史亡其
母之氏位

舒王誼初名謨帝愛其幼取爲子大曆十四年始王舒
與通虔肅資四王同封拜開府儀同三司詔有司給奉
稍俄以軍興罷謨於諸王最長帝欲試以事故拜涇原
節度大使時尚父郭子儀病篤帝臨軒遣謨持詔往視
謨冠遠遊冠御絳袍乘象輅四馬飛龍士三百國府官
皆袴褶以從子儀手叩頭謝恩謨宣詔已乃易服勞問
還於是李希烈反招討使李勉戰不勝奔宋州朝廷大
震乃拜謨揚州大都督荆襄江西沔鄂節度使諸軍行
營兵馬都元帥改名誼軍中以哥舒翰由元帥敗而王
所封同之帝乃使徙王晉以兵部侍郎蕭復爲統軍長
史湖南觀察使孔巢父爲行軍左司馬山南東道節度
行軍司馬樊澤爲右刑部員外郎劉從一侍御史韋儼
爲判官兵部員外郎高參掌書記右金吾大將軍渾瑊
爲中軍虞候江西節度使嗣曹王臯爲前軍兵馬使鄂
岳團練使李兼副之山南東道節度使賈耽爲中軍兵
馬使荆南節度使張伯儀爲後軍兵馬使左神武軍使

王价左衛將軍高承謙檢校太子詹事郭曙檢校右庶子常愿爲押衙未及行涇原兵士反誼從帝出奉天朱泚攻城誼晝夜傳勞諸軍不解帶帝還京師復故封揚州大都督如故永貞元年薨

通王諶始王拜開府儀同三司貞元九年領宣武節度大使以李萬榮爲留後二年徙河東以李說爲留後皆不出閣

出閣

肅王詳資秀異帝愛之建中二年薨甫四歲帝欲用浮屠說塔而不墳禮儀判官李岩諫非禮乃止詔贈揚州大都督

文敬太子諒見愛於帝命爲子貞元初先諸王王邕歷義武昭義二軍節度大使以張茂昭王虔休爲留後不出閣十五年薨年十八追贈及諡葬日羣臣以位而哭通化門外陵及廟置令丞云

資王謙亡薨年

代王謹始王縉雲郡蚤薨建中二年追王

昭王誠貞元二十一年始王亡薨年

欽王諤順宗卽位與珍王同封亡薨年

珍王誠大和六年薨

順宗二十七子莊憲皇后生憲宗皇帝及緡張昭訓生經趙昭儀生結王昭儀生總約緝餘二十王史亡母之氏位四王蚤薨亡官諡

鄭王經本名渙貞元四年始王建康郡與廣陵洋州臨淮弘農漢東晉陵高平雲安宣城德陽河東洛交十二王同封二十一年又與均淑莒密郃邵宋集冀和衡欽會珍福撫岳袁桂翼二十王皆進王王二十九年大和

八年薨

均王緯初名沔王洋川後進王王三十二年開成二年

薨

淑王縱初名洵王臨淮後進王王三十二年開成元年

薨

莒王紆初名浼爲祕書監王弘農後進王王二十九年

大和八年薨

密王綢初名泳王漢東後進王王三年元和二年薨

郃王總初名湜授少府監王晉陵後進王王四年元和

三年薨

三年刊

卷之三

列傳

三

邵王約初名淑爲國子祭酒王高平進王王二年元和元年薨

宋王結初名滋王雲安進王王十八年長慶二年薨

集王緝初名淮王宣城進王王十八年長慶二年薨

冀王綰初名湑爲太常卿王德陽進王王三十年大和

九年薨

和王綺初名浥王河東進王王二十八年大和七年薨

衡王絢王二十二年寶曆二年薨

會王纁王六年元和五年薨

福王綰歷魏博節度大使咸通元年進拜司空王五十

七年咸通二年薨

珍王繕初名況王洛交後進王七薨年

撫王紘咸通初歷司空又進司徒太尉王七十二年乾

符三年薨

岳王緝王二十三年大和二年薨

袁王紳王五十六年咸通元年薨

桂王綸王十年元和九年薨

翼王綽王五十八年咸通三年薨

斬王緝王六年咸通八年薨

欽王績亡薨年

憲宗二十子紀美人人生寧懿安白皇后生穆宗皇帝孝明皇
后生宣宗皇帝餘十七王皆後宮所生也逸其母之號氏
惠昭太子寧貞元二十一年始王平原與同安彭城
高密文安四王同封帝即位進王鄧與澧深洋絳四
王同封於是國嗣未立李絳等建言聖人以天下爲大
器知一人不可獨化四海不可無本故建太子以自副
然後人心定宗祏安有國不易之常道陛下受命四年
而冢子未建是開窺覷之端乖慎重之義非所以承列
聖示萬世帝曰善以寧爲皇太子更名宙前以制示絳
等未幾復初名冊禮用孟夏雨不克改用孟秋亦雨冬
十月克行禮明年薨年十九

澧王憚始王同安後進王惠昭之喪吐突承瓘議復立
儲副意屬憚帝自以穆宗爲太子帝崩之夕承瓘死王
被殺祕不發喪久之以告廢朝三日三子曰漢王東陽
郡曰源安陸曰演臨安初憚名寬深王察洋王寰絳王
察建王審元和七年並改今名

深王悰始王彭城郡進王深子潭王河內淑吳興洋王
忻始王高密進王洋大和二年薨子沛王潁川郡

絳王悟始王文安進王敬宗崩蘇佐明等矯詔以王領
軍國事王守澄等立文宗王見殺二子洙王新安滂高

平

建王恪元和元年始封時淄青節度使李師古死其弟

師道句符節故詔恪為鄆州大都督平盧軍淄青等州

節度大使以師道為留後然不出閣長慶元年薨無嗣

鄜王憬長慶元年始王與瓊沔婺茂淄衢澶七王同封

開成四年薨子溥平陽郡王

瓊王悅子津河間郡王

沔王恂子瀛晉陵郡王

婺王懌子清新平郡王

茂王愔子德武功郡王

淄王協開成元年薨子澣許昌郡王渙馮翊郡王

衡王憺子涉晉平郡王

澶王忱子濤鴈門郡王

棣王惲大中六年始王與彭信二王同封咸通三年薨

無嗣

彭王愬乾寧中韓建殺之石隄谷無嗣

信王檀咸通八年薨無嗣

榮王愆咸通三年始王廣明初拜司空子令平嗣王凡

八王史失其薨年

穆宗五子恭僖皇后生敬宗皇帝貞獻皇后生文宗皇

帝宣懿皇后生武宗皇帝餘二王亡其母之氏位
懷懿太子湊少雅裕有尋矩長慶元年始王漳與安王
同封文宗卽位疾王守澄頗很引支黨撓國謀盡誅之
密引宰相宋申錫使爲計守澄客鄭注伺知之以告乃
謀先事殺申錫又以王賢有中外望因欲株聯大臣族
夷之乃令神策虞候豆盧著上飛變且言宮史晏敬則
朱訓與申錫昵吏王師文圖不軌訓嘗言上多疾太子
幼若兄終弟及必漳王立申錫陰以金幣進王而王亦
以珍服厚答卽捕訓等繫神策獄榜掠定其辭諫官羣
伏閣極言出獄牒付外雜治注等懼事洩乃請下詔貶
王帝未之悟因黜湊爲巢縣公時大和五年也命中人
持詔卽賜且慰曰國法當爾無它憂八年薨贈齊王注
後以罪誅帝哀湊被讒死不自明開成三年追贈
安王溶初楊賢妃得寵於文宗晚稍多疾妃陰請以王
爲嗣密爲自安地帝與宰相李珣謀珣謂不可乃止及
帝崩仇士良立武宗欲重己功卽適溶嘗欲以爲太子
事殺之

敬宗五子妃郭氏生普餘四王亡母之氏位

悼懷太子普姿性韶悟寶曆元年始王晉文宗愛之若
己子嘗欲爲嗣大和二年薨帝惻念不能已故贈卹加

焉敬宗第二子休復文宗開成二年封梁王第三子執
中爲襄王第四子言揚爲紀王第五子成美爲陳王執
中子案爲樂平郡王

陳王成美初文宗以莊恪薨大臣數請建東宮開成四
年帝乃立成美爲皇太子典冊未具而帝崩仇士良立
武宗殺之於邸子儼王宣城郡

文宗二子王德妃生永後帝生宗儉

莊恪太子永大和四年始王魯帝以王幼宜得賢輔因
召見傅和元亮元亮以卒史進有所問不能答帝責謂
宰相王可教官屬應任士大夫賢者寧元亮比邪於是

劇選戶部侍郎庾敬休兼王傅太常卿鄭肅兼長史戶
部郎中李踐方兼司馬六年遂立爲皇太子帝承寶曆
荒怠身勤儉率天下謂晉王生謹敏欲引爲嗣會蚤夭
故久不議東宮事及太子立天下屬心焉開成三年詔
宮臣詣崇明門謁朔望侍讀偶日入對太子稍事燕豫
不能壹循法保傳戒告愬不納又母愛弛楊賢妃方幸
數譖之帝它日震怒御延英引見羣臣詔曰太子多過
失不可屬天下其議廢之羣臣頓首言太子春秋盛雖
有過尚可改且天下本不可輕動惟陛下幸赦御史中
丞狄兼暮流涕固爭帝未決罷羣臣又連章論救意稍

釋詔太子還少陽院以中人護視誅倖昵數十人勅侍
讀竇宗直周敬復詣院授經然太子終不能自白其讒
而行已亦不加脩也是年暴薨帝悔之明年下詔以陳
王爲太子置酒殿中有俳兒緣橦父畏其顛環走橦下
帝感動謂左右曰朕有天下返不能全一兒乎因泣下
卽取坊工劉楚才等數人付京兆榜殺之及禁中女倡
十人斃永巷皆短毀太子者宰相楊嗣復等不及知因
言楚才等罪當誅京兆殺之不覆奏敢以請翌日詔京
兆後有決死勅不覆者亦許如故事以聞

蔣王宗儉開成二年始王亡薨年

武宗五子其母氏位皆不傳

杞王峻開成五年始王

益王峴會昌二年始王與兗德昌二王同封

兗王岐

德王嶧

昌王嗟並逸其薨年

宣宗十一子元昭太后生懿宗皇帝餘皆亡其母之氏
位

靖懷太子漢會昌六年始王雍與夔慶二王同封大中
六年薨有詔追冊

雅王涇大中元年始王亡薨年

通王滋會昌六年始王夔與慶王沂同封帝初詔鄆王居十六宅餘五王處大明宮內院以諫議大夫鄭漳兵部郎中李鄴爲侍讀五日一謁乾符門爲王授經鄆王立爲懿宗乃罷滋徙王昭宗乾寧三年領侍衛諸軍是時誅王行瑜而李茂貞怨以兵入覲詔滋與諸王分統安聖捧宸保寧安化軍衛京師天子將狩太原韓建道迎之留次華州建畏王等有兵遣人上急變告諸王欲殺建脅帝幸河中帝驚召建諭之稱疾不肯入勅滋與睦王濟王韶王彭王韓王沂王陳王謁建自解建留軍中奏言中外異體臣不可以私見又言晉八王擅權卒敗天下請歸十六宅悉罷所領兵帝不許建以兵環行在請誅大將李筠帝懼斬筠以謝建盡逐衛兵自是天子孤弱矣初帝使嗣延王戒丕嗣丹王允往見李克用二王還建惡之又嗣覃王嘗督軍伐茂貞於是劾奏比歲兵纏近輔諸王階其禍使乘輿越在下藩不得安臣已請解其兵今延覃丹三王尚陰計以危國請誅之帝曰渠至是邪後三日與劉季述矯詔以兵攻十六宅諸王被髮乘垣走或升屋極號曰帝救我建乃將十一王并其屬至石堤谷殺之徐以謀反聞天下寃之濟韶彭

韓沂陳延覃丹九王史逸其系胄云

慶王沂大中十四年薨

濮王澤大中二年始王亡薨年

鄂王潤大中五年始王乾符三年薨

懷王洽大中八年與昭康二王同封亡薨年

昭王泂乾符三年薨

康王汶乾符四年薨

廣王灃大中十一年始王與衛王同封乾符四年薨

衛王灌大中十四年薨

懿宗八子惠安皇后生僖宗皇帝恭憲皇后生昭宗皇

帝餘六王亡其母氏位

魏王侑咸通三年始王與涼蜀二王同封

涼王佺乾符六年薨

蜀王倍

威王侃咸通六年始王郢十年徙王

吉王保咸通十三年始王與睦王同封王於兄弟為最

賢始僖宗崩王最長將立之楊復恭獨議以昭宗嗣乾

寧元年李茂貞等以兵入京師謀廢帝立王會李克用

以兵逐行瑜乃止

悲哀太子倚初封睦王為劉季述所殺天復初追贈

僖宗二子史失其母氏位

建王震中和元年始王

益王陞光啓三年始王並亡慶年

昭宗十七子積善皇后生裕及哀皇帝餘皆失母之氏位

德王裕大順二年始王帝幸華州韓建已奪諸王兵不自安乃請王皇子之未王者既又殺諸王因請立裕爲

皇太子釋言於四方時乾寧四年也劉季述等幽帝東內奉裕卽皇帝位季述誅裕匿右軍或請殺之帝曰太

子冲孺賊彊立之且何罪詔還少陽院復爲王朱全忠自鳳翔還見王春秋盛標宇軒秀忌之密語崔胤曰王

旣竊帝矣大義滅親渠可留公任宰相蓋啓之胤從容言如全忠意帝不許它日以語全忠全忠曰此國大事

臣安敢與此必胤賣臣也乃免帝遷洛它日謂蔣玄暉曰德王朕愛子全忠奈何欲殺之言已泣下自齧指流

血玄暉卽擿語全忠全忠恚帝被弑玄暉置酒邀諸王九曲池飲酣皆殺之投尸水中

棣王初乾寧元年始王與虔沂遂三王同封虔王禊

沂王禊

遂王禕

景王祕乾寧四年始王與祁王同封

祁王祺

雅王禎光化元年始王與瓊王同封

瓊王祥

端王禎天祐元年始王與豐和登嘉四王同封

豐王祁

和王福

登王禕

嘉王祐

賴王禎天祐二年始王與蔡王祐同封

蔡王祐

贊曰唐自中葉宗室子孫多在京師幼者或不出閣雖以國王之實與匹夫不異故無赫赫過惡亦不能為王室軒輊運極不還與唐俱殫然則歷數短長自有底止彼漢七國晉八王不得其效愈速禍云

唐書卷八十二終

唐書卷八十三

諸公王列傳第八

宋宋祁撰

皇明朝列大夫國子監祭酒臣蕭良有

承直

印即

司業臣葉向高等奉

勅重較刊

皇明朝列大夫國子監祭酒臣吳士元

承德郎司業仍加俸一級臣黃

錦等奉

旨重修

世祖一女

同安公主高祖同母媼也下嫁隋州刺史王裕貞觀時以屬尊進大長公主嘗有疾太宗躬省視賜縑五百姆侍皆有齋予永徽初賜實戶三百慶年八十六裕隋司徒柬之子終開府儀同三司

高祖十九女

萬曆二十二年刊

唐書卷八十三

列傳

一

長沙公主下嫁馮少師

襄陽公主下嫁竇誕

平陽昭公主太穆皇后所生下嫁柴紹初高祖兵興主居長安紹曰尊公將以兵清京師我欲往恐不能偕奈何主曰公行矣我自爲計紹詭道走并州主奔鄆發家貲招南山亡命得數百人以應帝於是名賊何潘仁璧司竹園殺行人稱總管主遣家奴馬三寶喻降之共攻鄆別部賊李仲文向善志丘師利等各持所領會戲下因略地盤屋武功始平下之乃申法誓衆禁剽奪遠近咸附勒兵七萬威振關中帝度河紹以數百騎並南山來迎主引精兵萬人與秦王會渭北紹及主對置幕府分定京師號娘子軍帝卽位以功給賚不涯武德六年薨葬加前後部羽葆鼓吹大路麾幢虎賁甲卒班劍太常議婦人葬古無鼓吹帝不從曰鼓吹軍樂也往者主身執金鼓參佐命千古有邪宜用之

高密公主下嫁長孫孝政又嫁段綸綸隋兵部尚書文振子爲工部尚書杞國公永徽六年主薨遺命吾葬必令墓東向以望獻陵冀不忘孝也

長廣公主始封桂陽下嫁趙慈景慈景隴西人帝笑其姿制故妻之帝起兵或勸亡去對曰母以我爲命且安

往吏捕繫于獄帝平京師引拜開化郡公爲相國府文學進兵部侍郎爲華州刺史討堯君素戰死贈秦州刺史謚曰忠公主更嫁楊師道聰悟有思工爲詩豪侈自肆晚稍折節以壽薨

長沙公主始封萬春下嫁豆盧寬子懷讓

房陵公主始封永嘉下嫁竇奉節又嫁賀蘭僧伽

九江公主下嫁執失思力

廬江公主下嫁喬師望爲同州刺史

南昌公主下嫁蘇勣

安平公主下嫁楊思敬

淮南公主下嫁封道言

真定公主下嫁崔恭禮

衡陽公主下嫁阿史那社尒

丹陽公主下嫁薛萬徹萬徹意甚公主羞不與同席者

數月太宗聞笑焉爲置酒悉召它壻與萬徹從容語握

梨賭所佩刀陽不勝遂解賜之主喜命同載以歸

臨海公主下嫁裴律師

館陶公主下嫁崔宣慶

安定公主始封千金下嫁溫挺挺死又嫁鄭敬玄

常樂公主下嫁趙瓌生女爲周王妃武后殺之逐瓌括

州刺史徙壽州越王貞將舉兵遣環書假道環將應之
主進使者曰爲我謝王與其進不與其退若諸王皆文
夫不應淹久至是我聞楊氏篡周尉遲迥乃周出猶能
連突厥使天下響震况諸王國懿親宗社所託不捨生
取義尚何須邪人臣同國患爲忠不同爲逆王等勉之
王敗周興劾環與主進謀皆被殺

太宗二十一女

襄城公主下嫁蕭銳性孝睦動循矩法帝勅諸公主視
爲師式有司告營別第辭曰婦事舅姑如父母異宮則
定省闕止葺故第門列雙戟而已銳卒更嫁姜簡永徽

二一年薨高宗舉哀於命婦朝堂遣工部侍郎丘行淹馳
驛弔祭陪葬昭陵喪次故城帝登樓望哭送柩

汝南公主蚤薨

南平公主下嫁王敬直以累斥嶺南更嫁劉玄意

遂安公主下嫁竇達達死又嫁王大禮

長樂公主下嫁長孫冲帝以長孫皇后所生故勅有司
裝齋視長公主而陪之魏徵曰昔漢明帝封諸王曰朕
子安得同先帝子乎然則長公主者尊公主矣制有等
差渠可越也帝以語后后曰嘗聞陛下厚禮徵而未知
也今聞其言乃納王於義社稷臣也妾於陛下夫婦之

重有所言猶儼顏色况臣下情隔禮殊而敢犯嚴顏陳忠言哉願許之與天下為公帝大悅因請齎帛四十匹錢四十萬卽徵家賜之

豫章公主下嫁唐義識

北景公主始封巴陵下嫁柴令武坐與房遺愛謀反同主賜死顯慶中追贈立廟於墓四時祭以少牢

普安公主下嫁史仁表

東陽公主下嫁高履行高宗卽位進為大長公主章正矩之誅主坐婚家斥徙集州又坐章懷太子累奪邑封以長孫無忌舅族也故武后惡之垂拱中并二子徙置

巫州

臨川公主章貴妃所生下嫁周道務工籀隸能屬文高宗立上孝德頌帝下詔褒答永徽初進長公主恩賞卓異永淳初薨道務殿中太監譙郡公範之子初道務孺穉時以功臣子養宮中範卒還第毀瘠如成人復內之年十四乃得出歷營州都督檢校右驍衛將軍謚曰襄

清河公主名敬字德賢下嫁程懷亮薨麟德時陪葬昭陵懷亮知節子也終寧遠將軍

蘭陵公主名淑字麗貞下嫁竇懷哲薨顯慶時懷哲官

兗州都督太穆皇后之族子

晉安公主下嫁韋思安又嫁楊仁贍

安康公主下嫁獨孤謀

新興公主下嫁長孫曠

城陽公主下嫁杜荷坐太子承乾事誅又嫁薛瓘初主之婚帝使卜之繇曰二火皆食始同榮末同戚請晝昏則吉馬周諫曰朝謁以朝思相戒也講習以晝思相成也燕飲以晝思相歡也婚合以夜思相親也故上下有成內外有親動息有時吉凶有儀今先亂其始不可爲也夫卜所以決疑若黷禮慢先聖人所不用帝乃止麟

德初瓘歷左奉宸衛將軍主坐巫蠱斥瓘房州刺史主從之宮咸亨中主薨而瓘卒雙樞還京師子顓封河東縣侯濟州刺史琅邪王冲起兵顓與弟紹以所部庸調作兵募士且應之冲敗殺都吏以滅口事泄下獄俱死合浦公主始封高陽下嫁房玄齡子遺愛主帝所愛故禮異它壻主負所愛而驕房遺直以嫡當拜銀青光祿大夫讓弟遺愛帝不許玄齡卒主導遺愛異貲既而反譖之遺直自言帝痛讓主乃免自是稍疏外主怏怏會御史劾盜得浮屠辯機金寶神枕自言主所賜初浮屠廬主之封地會主與遺愛獵見而悅之具帳其廬與之

亂更以二女子從遺愛私餉億計至是浮屠殊死殺奴
婢十餘主益望帝崩無哀容又浮屠智勗迎占禍福惠
弘能視鬼道士李晃高醫皆私侍主主使掖廷令陳玄
運伺宮省機祥步星次永徽中與遺愛謀反賜死顯慶
時追贈

金山公主蚤薨

晉陽公主字明達幼字兒子女德皇后所生未嘗見喜
慍色帝有所怒責必伺顏徐徐辯解故省中多蒙其惠
莫不譽愛后崩時主始孩不之識及五歲經后所游地
哀不自勝帝諸子唯晉王及主最少故親畜之王每出

閣主送至虔化門泣而別王勝衣班于朝主泣曰兄今
與羣臣同列不得在內乎帝亦爲流涕主臨帝飛白書
下不能辯薨年十二帝閱三旬不常膳日數十哀因以
癯羸羣臣進勉帝曰朕渠不知悲愛無益而不能已我
亦不知其所以然因詔有司簿主湯沐餘貲營佛祠墓
側

常山公主未及下嫁薨顯慶時

新城公主晉陽母弟也下嫁長孫詮詮以罪徙雋州更
嫁韋正矩爲奉冕大夫遇主不以禮俄而主暴薨高宗
詔三司雜治正矩不能辯伏誅以皇后禮葬昭陵旁

高宗三女

義陽公主蕭淑妃所生下嫁權毅

高安公主義陽母弟也始封宣城下嫁潁州刺史王勗
天授中勗爲武后所誅神龍初進冊長公主實封千戶
開府置官屬睿宗立增戶千薨開元時玄宗哭於暉政
門遣大鴻臚持節赴弔京兆尹攝鴻臚護喪事

太平公主則天皇后所生后愛之傾諸女榮國夫人死
后丐主爲道士以幸冥福儀鳳中吐蕃請主下嫁后不
欲棄之夷乃真築宮如方士薰戒以拒和親事久之主
衣紫袞玉帶折上巾具紛纒歌舞帝前帝及后大笑曰
兒不爲武官何遽亦主曰以賜駙馬可乎帝識其意擇
薛紹尚之假萬年縣爲婚館門隘不能容翟車有司毀
垣以入自興安門設燎相屬道樾爲枯紹死更嫁武承
嗣會承嗣小疾罷婚后殺武攸暨妻以配主主方頰廣
頤多陰謀后常謂類我而主內與謀外檢畏終后世無
它訾未淳之前親王食實戶八百增至千輒止公主不
過三百而主獨加戶五千及聖曆時進及三千戶預誅
二張功增號鎮國與相王均封五千而薛武二家女皆
食實封主與相王衛王成王長寧安樂二公主給衛士
環第十步一區持兵呵衛僭肖宮省神龍時與長寧安

樂宣城新都定安金城凡七公主皆開府置官屬視親
王安樂戶至三千長寧二千五百府不置長史宣城定
安非韋后所生戶止二千主三子崇簡崇敏崇行皆拜
三品韋后上官昭容用事自以謀出主下遠甚憚之主
亦自以軋而可勝故益橫於是推進天下士謂儒者多
窶狹厚持金帛謝之以動大議遠近翕然嚮之玄宗將
誅韋氏主與祕計遣子崇簡從事定將立相王未有以
發其端者主顧溫王乃兒子可劫以爲功乃入見王曰
天下事歸相王此非兒所坐乃掖王下取乘輿服進睿
宗睿宗卽位主權由此震天下加實封至萬戶三子封
王餘皆祭酒九卿王每奏事漏數徙乃得退所言皆從
有所論薦或自寒穴躡進至侍從旋踵將相朝廷大政
事非關決不下聞不朝則宰相就第咨判天子殆畫可
而已主侍武后久善策人主微指先事逢合無不中用
園徧近甸皆上腴吳蜀嶺嶠市作器用州縣護送道相
望也天下珍滋譎怪克于家供帳聲伎與天子等待兒
曳紈縠者數百奴伯媼監千人隴右牧馬至萬匹長安
浮屠慧範畜貲千萬諧結權近本善張易之及易之誅
或言其豫謀者於是封上庸郡公月給奉稍主乳媪與
通奏擢三品御史大夫御史魏傳弓劾其姦賊四十萬

請論死中宗欲赦之進曰刑賞國大事陛下賞已妄加矣又欲廢刑天下其謂何帝不得已削銀青階大夫薛謙光劾慧範不法不可貸主爲申理故謙光等反得罪玄宗以太子監國使宋王岐王總禁兵主恚權分乘輦至光範門召宰相白廢太子於是宋璟姚元之不悅請出主東都帝不許詔主居蒲州主大望太子懼奏斥璟元之以銷戢怨嫌監察御史慕容珣復劾慧範事帝疑珣離間骨肉貶密州司馬主居外四月太子表追還京師時宰相七人五出主門下又左羽林大將軍常元楷知羽林軍李慈皆私謁主主內忌太子明又宰相皆其黨黑乃有逆謀先天二年與尚書左僕射竇懷貞侍中岑羲中書令蕭至忠崔湜太子少保許稷雍州長史李晉右散騎常侍昭文館學士賈膺福鴻臚卿唐駿及元楷慈慧範等謀廢太子使元楷慈舉羽林兵入武德殿殺太子懷貞羲至忠舉兵南衙爲應既有日矣太子得其姦召岐王薛王兵部尚書郭元振將軍王毛仲殿中少監姜皎中書侍郎王琚吏部侍郎崔日用定策前一日因毛仲取內閑馬二百率太僕少卿李令問王守二內侍高力士果毅李守德叩虔化門梟元楷慈於北闕下縛膺福內客省執羲至忠至朝堂斬之因大赦天下主

聞變亡入南山三日不出賜死于第諸子及黨與死者數十人簿其田貲瓌瑋若山督子貧凡三年不能盡崇簡素知主謀苦諫主怒榜掠尤楚至是復官爵賜氏李始主作觀池樂游原以爲盛集旣敗賜寧申岐薛四王都人歲被禊其地

中宗八女

新都公主下嫁武延暉

宜城公主始封義安郡主下嫁裴巽巽有嬖妹主恚割耳削鼻且斷巽髮帝怒斥爲縣王巽左遷久之復故封

神龍元年與長寧新寧義安安樂新平五郡主皆進封定安公主始封新寧郡主嫁王同皎同皎得罪神龍時又嫁韋濯濯卽韋皇后從祖弟以衛尉少卿誅更嫁大府卿崔銑主薨王同皎子請與父合葬給事中夏侯銑曰主義絕王廟恩成崔室逝者有知同皎將拒諸泉銑或訴於帝乃止銑坐是貶瀘州都督

長寧公主韋庶人所生下嫁楊慎交造第東都使楊務廉營總第成府財幾竭乃擢務廉將作大匠又取西京高士廉第左金吾衛故營合爲宅右屬都城左頰大道作三重樓以馮觀築山浚池帝及后數臨幸置酒賦詩又并坊西隙地廣鞠場東都廢永昌縣王旬其治爲府

以地瀕洛築鄣之崇臺蜚觀相聯屬無慮費二十萬魏
王泰故第東西盡一坊瀦沼三百畝泰薨以與民至是
主旬得之亭閣華詭埒西京內倚母愛寵傾一朝與安
樂宣城二主后媚邠國崇國夫人爭任事昧謁紛紜東
都第成不及居韋氏敗斥慎交絳州別駕主偕往乃請
以東都第為景雲祠而西京鬻第評木石直為錢二十
億萬開元十六年慎交死主更嫁蘇彥伯務廉卒坐贓
數十萬廢終身

永壽公主下嫁韋鍼蚤薨長安初追贈
永泰公主以郡主下嫁武延基大足中忤張易之為武
后所殺帝追贈以禮改葬號墓為陵

安樂公主最幼女帝遷房陵而主生解衣以祿之名曰
裹兒姝秀辯敏后尤愛之下嫁武崇訓帝復位光艷動
天下侯王柄臣多出其門嘗作詔籍其前請帝署可帝
笑從之又請為皇太女左僕射魏元忠諫不可主曰元
忠山東木強烏足論國事阿武子尚為天子天子女有
不可乎與太平等七公主皆開府而主府官屬尤濫皆
出屠販納訾售官降墨勅斜封授之故號斜封官主營
第及安樂佛廬皆憲寫宮省而工緻過之嘗請昆明池
為私沼帝曰先帝未有以與人者主不悅自鑿定昆池

延表數里定言可抗訂之也司農卿趙履溫爲繕治累石肖華山墜狗橫邪回淵九折以石漢水又爲寶鑪鏤恠獸神禽間以琛貝珊瑚不可涯計崇訓死王素與武延秀亂卽嫁之是日假后車輅自宮送至第帝與后爲御安福門臨觀詔雍州長史竇懷貞爲禮會使弘文學士爲儉相王障車捐賜金帛不貲翌日太會羣臣太極殿主被翠服出嚮天子再拜南面拜公卿公卿皆伏地稽首武攸暨與太平公主偶舞爲帝壽賜羣臣帛數十萬帝御承天門大赦因賜民酺三日內外官賜勳緣禮官屬兼階爵奪臨川長公主宅以爲第旁徹民廬怨聲囂然第成禁藏空殫假萬騎仗內音樂送王還第天子親幸宴近臣崇訓子方數歲拜太常卿封鎬國公實封戶五百公主滿孺月帝后復幸第大赦天下時王與長寧定安三家廝臺掠民子女爲奴婢左臺侍御史袁從一縛送獄主入訴帝爲手詔喻免從一曰陛下納王訴縱奴騶掠平民何以治天下臣知放奴則免禍劾奴則得罪於主然不忍屈陛下法自偷生也不納臨瀛王誅庶人王方覽鏡作眉聞亂走至右延明門兵及斬其首追貶爲悖逆庶人睿宗卽位詔以二品禮葬之趙履溫諂事王嘗褫朝服以項挽車庶人死蹈舞承天門呼萬

歲臨淄王斬之父子同刑百姓疾其興役割取肉去
成安公主字季姜始封新平下嫁韋捷捷以韋后從子
誅王後薨

睿宗十一女

壽昌公主下嫁崔真

安興昭懷公主蚤薨

荆山公主下嫁薛伯陽

淮陽公主下嫁王承慶

代國公主名華字華婉劉皇后所生下嫁鄭萬鈞

涼國公主字華莊始封仙源下嫁薛伯陽

薛國公主始封清陽下嫁王守一守一誅更嫁裴巽

鄖國公主崔貴妃所生三歲而妃薨哭泣不食三日如
成人始封荆山下嫁薛倣又嫁鄭孝義開元初封邑至
千四百戶

金仙公主始封西城縣王景雲初進封太極元年與王
真公主皆爲道士築觀京師以方士史崇玄爲師崇玄
本寒人事太平公主得出入禁中拜鴻臚卿聲執光重
觀始興詔崇玄護作日萬人羣浮屠疾之以錢數十萬
賂狂人段謙冒入承天門升太極殿自稱天子有司執
之辭曰崇玄使我來詔流嶺南且勅浮屠方士無兩競

太平敗崇玄伏誅

玉真公主字持盈始封崇昌縣主俄進號上清玄都大洞三景師天寶三載上言曰先帝許妾捨家今仍叨主第食租賦誠願去公主號罷邑司歸之王府玄宗不許又言妾高宗之孫睿宗之女陛下之女弟於天下不爲賤何必名繫主號資湯沐然後爲貴請入數百家之產延十年之命帝知主意乃許之慶寶應時

霍國公主下嫁裴虛已

玄宗二十九女

永穆公主下嫁王絲

常芬公主下嫁張去奔

孝昌公主蚤薨

唐昌公主下嫁薛鏞

靈昌公主蚤薨

常山公主下嫁薛譚又嫁賞澤

萬安公主天寶時爲道士開元新制長公主封戶二千帝妹戶千率以三丁爲限皇子王戶二千王半之左右以爲薄帝曰百姓租賦非我有士出萬死賞不過束帛女何功而享多戶邪使知儉嗇不亦可乎於是公主所稟始不給車服後咸宜以母愛益封至千戶諸主皆增

自是著于令主不下嫁亦封千戶有司給奴婢如令
上仙公主蚤薨

懷思公主蚤薨葬築臺號登真

晉國公主始封高都下嫁崔惠童貞元元年與衛楚宋
齊宿蕭鄧紀郃國九公主同徙封

新昌公主下嫁蕭衡

臨晉公主皇甫淑妃所生下嫁郭潛曜薨大曆時

衛國公主始封建平下嫁豆盧建又嫁楊說薨貞元時
真陽公主下嫁源清又嫁蘇震

信成公主下嫁獨孤明

楚國公主始封壽春下嫁吳澄江上皇居西宮獨主得
入侍興元元年請為道士詔可賜名上善

普康公主蚤薨咸通九年追封

昌樂公主高才人所生下嫁竇鏐薨大曆時

永寧公主下嫁裴齊丘

宋國公主始封平昌下嫁溫西華又嫁楊徽薨元和時
齊國公主始封興信徙封寧親下嫁張垆又嫁裴頴末

嫁楊敷薨貞元時

咸宜公主貞順皇后所生下嫁楊洄又嫁崔嵩薨與元
時

宜春公主蚤薨

廣寧公主董芳儀所生下嫁程昌胤又嫁蘇克貞薨大

曆時

萬春公主杜美人所生下嫁楊肱又嫁楊錡薨大曆時

太華公主貞順皇后所生下嫁楊錡薨天寶時

壽光公主下嫁郭液

樂城公主下嫁薛履謙坐嗣岐王珍事誅

新平公主常才人所生幼智敏習知圖訓帝賢之下嫁

裴玲又嫁姜慶初慶初得罪主幽禁中薨大曆時

壽安公主曹野那姬所生孕九月而育帝惡之詔永羽

人服代宗以廣平王入謁帝呼王曰壽安後可與

名王在靈州請封下嫁蘇發

蕭宗七女

宿國公主始封長樂下嫁豆盧湛

蕭國公主始封寧國下嫁鄭巽又嫁薛康衡乾元元年

降回紇英武威遠可汗乃置府二年還朝貞元中讓府

屬更置邑司

和政公主章敬太后所生生三歲后崩養于韋妃性敏

惠事妃有孝稱下嫁柳潭安祿山陷京師寧國公主方

嫠居王棄二子奪潭馬以載寧國身與潭步日百里潭

躬水薪王躬爨以奉寧國初潭兄澄之妻楊貴妃姊也
勢幸傾朝公主未嘗干以私及死撫其子如所生從玄
宗至蜀始封遷潭附馬都尉郭千仞反玄宗御玄英樓
諭降之不聽潭率折衝張義童等殊死鬪王發弓殺潭
潭手斬賊五十級平之肅宗有疾王待左右勤勞詔賜
田以女弟寶章主未有賜固讓不敢當阿布思之妻隸
掖廷帝宴使衣綠衣爲倡主諫曰布思誠逆人妻不容
近至尊無罪不可與羣倡處帝爲免出之自兵興財用
耗主以貿易取奇贏千萬贍軍及帝山陵又進邑入千
萬代宗初立屢陳人間利病國家盛衰事天子鄉納吐
蕃犯京師王避地南奔次商於遇羣盜主諭以禍福皆
稽顙願爲奴代宗以王貧詔諸節度餉億主一不取親
紉袿裳衣諸子不服統絺廣德時吐蕃再入寇主方姪
入語備邊計譚固止主曰君獨無兄乎入見內殿翌日
免乳而薨

郊國公主始封大寧下嫁張清薨貞元時

紀國公主始封宜寧下嫁鄭沛薨元和時

永和公主韋妃所生始封寶章下嫁王詮薨大曆時

郃國公主始封延光下嫁裴徽又嫁蕭升升卒王與彭
州司馬李萬亂而蜀州別駕蕭鼎澧陽令韋惲太子詹

事李昇皆私侍王家久之姦聞德宗怒幽王它第杖殺
萬斤鼎憚昇嶺表貞元四年又以厭蠱廢六年薨子位
坐以蠱祝囚端州佩儒德因房州前生子駙馬都尉裴
液囚錦州王女爲皇太子妃帝畏妃怨望將殺之未發
會王薨太子屬疾乃殺妃以厭災諡曰惠

代宗十八女

靈仙公主蚤薨追封

真定公主蚤薨追封

永清公主下嫁裴倣

齊國昭懿公主崔貴妃所生始封升平下嫁郭曖大曆
未嘗內民訴涇水爲磴壅不得溉田京兆尹黎幹以請
詔撤磴以水與民時王及曖家皆有磴旬留帝曰吾爲
蒼生若可爲諸戚倡即日毀由是廢者八十所憲宗卽
位獻女伎帝曰太上皇不受獻朕何敢違還之薨元和
時贈號國賜諡穆宗立復贈封

華陽公主貞懿皇后所生韶悟過人帝愛之視帝所喜
必善遇所惡曲全之大曆七年以病旬爲道士號瓊華
真人病甚嚙帝指傷薨追封

玉清公主蚤薨追封

嘉禮公主下嫁高怡與普寧公主同降有司具冊禮光

順門以雨不克罷薨建中時
長林公主下嫁衛尉少卿沈明貞元二年具冊禮德宗
不御正殿不設樂遂為故事薨元和時

太和公主蚤薨追封

趙國莊懿公主始封武清貞元元年徙封嘉誠下嫁魏
博節度使田緒德宗幸望春亭臨餞厭翟不可乘以
金根代之公主出降乘金根車自王始薨元和時贈封
及諡

玉虛公主蚤薨

普寧公主下嫁吳士廣

晉陽公主下嫁太常少卿裴液薨太和時

義清公主下嫁祕書少監柳杲

壽昌公主下嫁光祿少卿竇克良薨貞元時

新都公主貞元十二年下嫁田華具禮光順門五禮由
是廢

西平公主蚤薨

章寧公主蚤薨

德宗十一女

韓國貞穆公主昭德皇后所生幼謹孝帝愛之始封唐
安將下嫁祕書少監韋宥未克而朱泚亂從至城固薨

加封諡

魏國憲穆公主始封義陽下嫁王士平王恣橫不法帝
幽之禁中錮士平于第久之拜安州刺史坐交中人貶
賀州司戶參軍門下客蔡南史獨孤申叔為王作團雪
散雪辭狀離曠意帝聞怒捕南史等逐之幾廢進士科
薨追封及諡

鄭國莊穆公主始封義章下嫁張孝忠子茂宗薨加贈
及諡

臨真公主下嫁祕書少監薛釗薨元和時

永陽公主下嫁殿中少監崔諲

普寧公主蚤薨

文安公主白為道士薨大和時

燕國襄穆公主始封咸安下降回紇武義成功可汗置
府薨元和時追封及諡

義川公主蚤薨

宜都公主下嫁殿中少監柳昱薨貞元時

晉平公主蚤薨

順宗十一女

漢陽公主名暢莊憲皇后所生始封德陽郡主下嫁郭
縱辭歸第涕泣不自勝德宗曰兒有不足邪對曰思相

離無它恨也帝亦泣顧太子曰真而子也永貞元年與
諸公主皆進封時戚近爭爲奢詔事主獨以儉常用鐵
簪畫壁記田租所入文宗尤惡世流侈因主人問曰姑
所服何年法也今之弊何代而然對曰妾自貞元時辭
宮所服皆當時賜未嘗敢變元和後數用兵悉出禁藏
纖麗物賞戰士由是散於人間內外相矜狃以成風若
陛下示所好于下誰敢不變帝悅詔宮人視主衣製廣
狹徧諭諸主且勅京兆尹禁切浮靡主嘗誨諸女曰先
姑有言吾與若皆帝子驕盈貴侈可戒不可恃開成五
年薨

梁國恭靖公主與漢陽同生始封咸寧郡主徙普安下
嫁鄭何薨追封及諡

東陽公主始封信安郡主下嫁崔杞

西河公主始封武陵郡主下嫁沈暉薨咸通時

雲安公主亦漢陽同生下嫁劉士涇

襄陽公主始封晉康縣主下嫁張孝忠子克禮主縱恣
常微行市里有薛樞薛渾李元本皆得私待而渾尤愛
至謁渾母如姑有司欲致詰多與金使不得發克禮以
聞穆宗幽主禁中元本乃功臣惟簡子故貸死流象州

樞渾崖州

潯陽公主崔昭儀所生太和三年與平恩邵陽二公主並爲道士歲賜封物七百疋

臨汝公主崔昭訓所生蚤薨

號國公主始封清源郡主徙陽安下嫁王承系薨追封

平恩公主蚤薨

邵陽公主蚤薨

憲宗十八女

梁國惠康公主始封普寧帝特愛之下嫁于季友元和

中徙永昌薨詔追封及謚將葬度支奏義陽義章公主

葬用錢四千萬有詔減千萬

永嘉公主爲道士

衡陽公主蚤薨

宣城公主下嫁沈儀

鄭國溫儀公主始封汾陽下嫁韋讓薨追封及謚

岐陽莊淑公主懿安皇后所生下嫁杜悰帝爲御正殿

臨遣繇西朝堂出復御延喜門止主車大賜賔從金錢

開第昌化里疏龍首池爲沼后家上尚父大通里亭爲

主別館貴震當世然主事舅姑以禮聞所賜奴婢偃蹇

皆上還旬直自帝悰爲澧州刺史主與偕從者不二十

婢乘驢不肉食州縣供具拒不受姑寢疾主不解衣藥

歷不嘗不進開成中惊自忠武入朝三疾侵日願朝興
慶宮雖死於道不恨道薨

陳留公主下嫁裴損損為太子諭德

真寧公主下嫁薛翊

南康公主下嫁沈汾薨咸通時

臨真公主始封襄城下嫁衛洙薨咸通時

普康公主蚤薨

真源公主始封安陵下嫁杜中立

永順公主下嫁劉弘景

安平公主下嫁劉異宣宗即位宰相以異為平盧節度
使帝曰朕唯一妹欲時見之乃止後隨異居外歲時輒
乘驛入朝薨乾符時

永安公主長慶初許下嫁回鶻保義可汗會可汗死止
不行太和中勾為道士詔賜邑印如尋陽公主故事且
歸婚贊

義寧公主未及下嫁薨

定安公主始封太和下嫁回鶻崇德可汗會昌三年來
歸詔宗正卿李仍叔祕書監李踐方等告景陵主次太
原詔使勞問係塗以黠曼斯所獻白貂皮玉指環往賜
至京師詔百官迎謁再拜故事也司官承命答拜有司

議邑司官卑不可當羣臣請以主左右上媵戴鬢帛承
拜兩襜持命又詔神策軍四百具鹵簿羣臣班迓主乘
輅謁憲穆二室欬歔流涕退詣光順門易服褫冠鑲待
罪自言和親無狀帝使中人勞慰復冠鑲乃入羣臣賀
天子又詣興慶宮明日主謁太皇太后進封長公主遂
廢太和府主始至宣城以下七主不出迎武宗怒差奪
封絹贖罪宰相建言禮始中壺行天下王化之美也請
載于史示後世詔可

貴鄉公主蚤薨

穆宗八女

義豐公主武貴妃所生下嫁韋處仁薨咸通時

淮陽公主張昭儀所生下嫁柳正元

延安公主下嫁竇滸

金堂公主始封晉陵下嫁郭仲恭薨乾符時

清源公主薨太和時

饒陽公主下嫁郭仲詞

義昌公主為道士薨咸通時

安康公主為道士乾符四年以主在外頗擾人詔與永

興天長寧國興唐四主還南內

敬宗三女

永興公主

天長公主

寧國公主薨廣明時

文宗四女

興唐公主

西平公主

朗寧公主薨咸通時

光化公主薨廣明時

武宗七女

昌樂公主

壽春公主

長寧公主薨大中時

延慶公主

靜樂公主薨咸通時

樂溫公主

永清公主薨咸通時

宣宗十一女

萬壽公主下嫁鄭顥主帝所愛前此下詔先王制禮貴
賤共之萬壽公主奉舅姑宜從士人法舊制車輿以錄
金鈿飾帝曰我以儉率天下宜自近始易以鈿主每進

見帝必諄勉篤誨曰無鄙夫家無干時事又曰太平安樂之禍不可不戒故諸王祇畏爭為可喜事帝遂詔夫婦教化之端其公主縣王有子而寡不得復嫁

永福公主

齊國恭懷公主始封西華下嫁嚴祁祁為刑部侍郎主
薨大中時追贈及諡

廣德公主下嫁于琮初琮尚永福公主主與帝食怒折

匕筋帝曰此可為士人妻乎更許琮尚主琮為黃巢所

害主泣曰今日誼不獨存賊宜殺我巢不許乃縊室中

主治家有禮法嘗從琮賤韶州侍者纔數人郢州縣饋

遺凡內外冠婚喪祭主皆身答勞疏戚咸得其心為世

聞婦

義和公主

饒安公主

盛唐公主

平原公主薨咸通時已而追封

唐陽公主

許昌莊肅公主下嫁柳涉薨中和時

豐陽公主

懿宗八女

衛國文懿公主郭淑妃所生始封同昌下嫁韋保衡咸
通十年薨帝既素所愛自製挽歌羣臣畢和又許百官
祭以金貝寓車廡服火之民爭取煨以汰寶及葬帝與
妃坐延興門哭以過柩仗衛彌數十里治金爲備恠寶
千計實墓中與乳保同葬追封及諡

安化公主

普康公主

昌元公主薨咸通時

昌寧公主

金華公主

仁壽公主

永壽公主

僖宗二女

唐興公主

永平公主

昭宗十一女

新安公主

平原公主積善皇后所生帝在鳳翔以王下嫁李茂貞
子繼偁后謂不可帝曰不爾我無安所是日宴內殿茂
貞坐帝東南王拜殿上繼偁族兄弟皆西向立王徧拜

之及帝還朱全忠移茂貞書取王還京師

信都公主

益昌公主

唐興公主

德清公主

太康公主

永明公主蚤薨

新興公主

普安公主

樂平公主

贊曰婦人內夫家雖天姬之貴史官猶外而不詳又僖昭之亂與策埃滅故諸帝公主降日薨年粗得其槩亡者闕而不書

唐書卷八十三
列傳
二十九

唐書卷八十三終

唐書卷八十四

李密列傳第九

宋宋祁撰

皇明朝列大夫國子監祭酒臣蕭良有

勅重較刊 承直郎 司業臣葉向高 寺奉

皇明朝列大夫國子監祭酒臣吳士元 承德郎 司業仍加俸一級臣黃 錦 寺奉

李密字玄邃一字法王其先遼東襄平人曾祖弼魏司徒賜姓徒何氏入周為太師魏國公祖暉邢國公父寬隋上柱國蒲山郡公遂家長安密趣解雄遠多策略散家貲養客禮賢不愛籍以蔭為左親衛府大都督東宮千牛備身額銳角方瞳子黑白明澈煬帝見之謂宇文述曰左仗下黑色小兒為誰曰蒲山公李寬子密帝曰

萬曆二十三年刊

唐書卷八十四

列傳

二十九

此兒顧眄不常無入衛宅日述諭密曰君世素貴當以
才學顯何事三衛間哉密大喜謝病去感厲讀書聞包
愷在緱山往從之以蒲鞮乘牛挂漢書一帙角上行且
讀越國公楊素適見于道按轡躡其後曰何書生勤如
此密識素下拜問所讀曰項羽傳因與語奇之歸謂子
玄感曰吾觀密識度非若等輩玄感遂傾心結納嘗私
謂密曰上多忌隋曆且不長中原有一日警公與我就後
先密曰決兩陣之勝噫嗚咄嗟足以警敵我不如公擊
天下英雄馭之使遠近歸屬公不如我大業九年玄感
舉兵黎陽遣人入關迎密密至謀曰今天子遠在遼左
去幽州尚千里南限鉅海北阻彊胡號令所通惟榆林
一道爾若鼓而入薊直扼其喉高麗抗其前我乘其後
不旬月齎糧竭舉麾召之衆可盡取然後傳檄而南天
下定矣上計也關中四塞之地彼留守衛文昇易人耳
若徑行勿留直保長安據函嶺東制諸夏是隋亡襟帶
我勢萬全中計也若因近趣便先取東都頓兵堅城下
不可以勝負決下計也玄感曰公之下計乃吾上策今
百官家屬皆在洛當先取之以搖其心且經城不拔何
以示武密計不行玄感至東都所戰必克自謂功在旦
暮既獲內史舍人韋福嗣遂任之故謀不專密福嗣恥

見執策議皆持兩端密揣其二謂玄感曰福嗣窮爲我
虜志在觀望公初舉大事姦人在側事必敗請斬以徇
不從密謂所親曰玄感好反而不圖勝吾屬虜矣福嗣
果遁去會左武侯大將軍李子雄得罪傳送行在道殺
使者奔玄感勸舉大號玄感問密密曰昔張耳諫陳勝
自王荀彧止魏武求九錫皆見疑外今密將無類之乎
然阿諛順旨非義士也且公雖屢勝而郡縣未有應者
東都尚彊救兵踵來公當率精甲身定關中奈何亟自
帝玄感笑而止及隋軍至玄感曰策安決密曰元弘嗣
方戍隴右可陽言其反使迎我因引軍西從之至陝欲
圍弘農宮密曰今給衆入關機在速而追兵踵我若前
不得據險退無所守何以共完玄感不聽留攻三日不
能拔引去至闕鄉追及而敗密羸行入關爲邏所獲與
支黨護送帝所密謂衆曰吾等至行在且蒞醢今尚可
以計脫何爲安就鼎鑊衆然之乃令出所有金示監使
曰卽死幸報德使者顧金禁漸弛益而酒飲笑譁守
者懈密等遂夜亡去抵平原賊郝孝德不見禮去之淮
陽歲饑削木皮以食變姓名爲劉智遠教授諸生自給
鬱鬱不得志哀吟泣下人有告太守趙佗者佗捕之遁
免往依媚婿雍丘令丘君明轉匿大俠王季才家爲吏

迹捕復亡去時東郡賊翟讓聚黨萬人密因介其徒王伯當以策于讓曰今主昏於上人怨於下銳兵盡之遼海和親絕於突厥南巡流連空棄關輔此實劉項挺興之會足下資豪傑士馬精勇指罪誅暴為天下先楊氏不足亡也讓由是加禮遣說諸賊至輒下因為讓計曰今稟無見糧難以持久卒遇敵其亡無時不如取滎陽休兵館穀待士逸馬肥乃可與人爭利讓聽之遂破金隄關徇滎陽諸縣皆下滎陽太守楊慶河南討捕大使張須陁合兵討讓讓素憚須陁欲引去密曰須陁健而無謀且驟勝易驕吾為公破之讓不得已俾而待密率驍勇常何等二十人為游騎伏于丘莽間須陁素輕讓引兵搏之讓少却伏發與游軍乘之遂殺須陁十三年讓分兵與密別為牙帳號蒲山公密持軍嚴雖盛夏號令士皆若負霜雪然戰得金寶盡散之繇是人為用復說讓曰今羣豪競興公宜先天下攘除羣凶寧常剽奪草間求活哉若直取興洛倉發粟以振窮乏百萬之眾一朝可附霸王之業成矣讓曰僕起畝隴志不及此須君得倉更議之二月密以千人出陽城北踰方山自羅口拔興洛倉據之獲縣長柴孝和開倉賑食眾繯屬至數十萬隋越王侗遣將劉長恭房胤討密又令裴仁基

統兵出成臯西密乃爲十隊跨洛水抗東西二軍令單
雄信徐世勣王伯當騎爲左右翼自引麾下急擊長恭
等破之東都震恐衆保太微城臺寺俱滿讓等乃推密
爲王建號魏公鞏南設壇場卽位刑牲歃血改元永平
大赦其文移稱行軍元帥魏公府以讓爲司徒酈元貞
左長史房彥藻右長史楊德方左司馬鄭德韜右司馬
單雄信左武侯大將軍徐世勣右武侯大將軍祖君彥
記室城洛口周四十里居之命護軍將軍田茂廣造雲
檣三百具以機發石爲攻城械號將軍礮進逼東都燒
上春門四月隋虎牢將裴仁基淮陽太守趙佗降長白
山賊孟讓以所部歸密以仁基爲上柱國與讓率兵二
萬襲回洛倉守之入都城掠居人火天津橋隋出軍乘
之仁基等敗還保鞏司馬楊德方戰死密自督衆三萬
破隋出車於故城復得回洛倉俄而德韜死乃以鄭頰
爲左司馬鄭虔象右司馬諸賊帥黎陽李文相洹水張
昇清河趙君德平原郝孝德皆歸密因襲取黎陽倉永
安大族周法明舉江黃地附之齊郡賊徐圓朗任城大
俠徐帥仁來歸密令幕府移檄州縣列煬帝十罪天下
震動護軍柴孝和說密曰秦地阻山帶河項背之亡漢
得之正今公以仁基壁回洛翟讓保洛口公東鎧鐘道

趨長安百姓誰不郊迎是征而不戰也衆附兵彊然後東向指爲豪傑天下靡靡無事矣令遲之恐爲人先密曰僕懷此久願我部皆山東人令未下洛安肯與我偕西且諸將皆羣盜不相統一敗則掃地矣遂止是時隋軍益出密負銳急與之确中流矢卧營中隋軍乘之密衆潰棄倉守洛口高祖起師太原密自謂主盟遣將軍張仁則致書于帝呼爲兄請以步騎會河內帝覽書笑曰密陸梁不可折簡致之吾方定京師未能東略若不與是生一隋密適爲吾守成阜拒東都兵使不得西更遣票將莫如密吾寧推順使驕其志我得留撫關中大事濟矣令記室溫大雅作報書厚禮尊讓密大喜示其下曰唐公見推顧天下無可慮者遂專事隋九月遣將李士才將兵十二萬攻隋鷹揚郎將張珣河陰舉之珣極罵不屈死齊方士徐鴻客上書勸密因士氣趨江都挾帝以令天下密異其言具幣邀之已亡去煬帝遣王世克選卒十萬擊密世克營洛西戰不利更陳洛北登山以望洛口密引度洛與世克戰密兵多騎與長槩而北薄山地隘騎走不得騁世克多短兵盾積蹙之密軍卻世克乘勝進攻密月城密還洛南引而西突世克營世克奔還師徒多喪孝和溺死

洛水密哭之慟自是大小六十餘戰翟讓部將王儒信
憚密威望勸讓自爲大家宰總乘衆務收密權讓允寬
亦曰天子當自取何乃授人密聞之與鄭頊陰圖讓會
世克兵又至讓出拒少退密馳助之戰石子河世克走
明日高會饗士讓至密所密令房彥藻引其左右就別
帳飲密出名弓示讓讓挽滿遣劔士蔡建從後擊之并
殺其兄姪及儒信密馳入讓壁慰諭士無敢動者以徐
世勣單雄信王伯當分統其兵隋將楊慶守滎陽因說
下之世克夜襲倉城密伏甲殪其衆義寧二年世克復
營洛北爲浮梁絕水以戰密以千騎迎擊不勝世克進
薄其壘密提敢死士數百邀之世克大潰士爭橋溺死
者數萬洛水爲不流殺大將六人獨世克脫會夜大雨
雪士卒僵死且盡密乘銳拔偃師脩金墉城居之有衆
三十萬又與東都留守韋津戰上春門執津於陣將作
大匠宇文愷子儒童河南留守職方郎柳績河陽都尉
獨孤武都河內郡丞柳燮皆降於是海岱江淮間爭響
附竇建德朱粲楊士林孟海公徐圓朗盧祖尚周法明
等悉上表勸進府官屬亦請之密曰東都未平且勿議
五月越王侗稱帝六月字文化及擁兵十餘萬至黎陽
侗遣使授密太尉尚書令東南道大行臺行軍元帥魏

國公令平化及而後入輔密受之乃引兵東追化及黎陽密知化及乏食利速戰乃持重以老其兵使徐世勣保黎陽倉化及攻不可下密與隔水陣進謂化及曰公家本戎隸破野頭爾父子兄弟受隋恩至妻公主上有失德不能諫又虐弑之冒天下之惡今安往能卽降尚全後嗣化及默然良久乃瞋目爲鄙語辱密密顧左右曰此庸人圖爲帝吾當折箠驅之乃以輕騎五百焚其攻具火終夜不滅度化及糧盡乃僞與和化及喜使軍恣食既而密饋不至乃寤遂大戰童山下密中矢頓汲縣墜壁化及勢窮掠汲郡趨魏縣其將陳智略張童仁等率所部兵歸密前後相踵初化及留輜重東郡遣所署刑部尚書王軌守之至是軌舉郡降密由是引而西遣使朝東都執弑逆人于弘達獻於侗侗召密入朝至溫聞世克殺元文都乃止遂歸金墉拘侗使不遣初密旣殺翟讓心稍驕不卹士素無府庫財軍戰勝無所賜與又厚撫新集人心始離民食興洛倉者給授無檢至負取不勝委於道踐蹂狼扈密喜自謂足食司倉賈潤甫諫曰人國本食人天今百姓饑捐暴骨道路公雖受命然賴人之天以固國本而稟取不節敖庾之藏有時而餽粟竭人散胡仰而成功不聽徐世勣數規其違密

內不意使出就屯故下苟且無固志初世克乏食密少
帛請交相易難之邴元真好利陰勸密許焉後世克士
飽降者益少密悔而止武德元年九月世克悉衆決戰
先以騎數百度河密遣迎戰驍將十餘人皆被劒返明
日密留王伯當守金墉自引精兵出偃師北阻邴山待
之密議所便裴仁基曰世克悉勁兵來東都必虛請選
衆二萬向洛世克必自拔歸我整軍徐還兵法所謂彼
歸我出彼出我歸以疲之也密眩於衆不能用仁基擊
地嘆曰公後必悔遂出兵陣世克陰索貌類密者使縛
之旣兩軍接埃霧囂塞世克軍江淮士出入若飛密與
心動世克督衆疾戰使索類密者過陣謀曰獲密矣士
皆呼萬歲密軍亂遂潰裴仁基祖君彥皆爲世克所禽
偃師劫鄭頊叛歸世克密提衆萬餘馳洛口將入城邴
元真已輸款世克潛導其軍密知不發期世克度兵半
洛水掩擊之候騎不時覺比出世克絕河矣卽引騎遁
武牢元真遂降衆稍散密將如黎陽或曰向殺翟讓世
勣傷幾死瘡猶未平今可保乎時王伯當棄金墉屯河
陽密輕騎歸之謂曰敗矣久苦諸君我今自刎以謝衆
伯當抱密慟絕衆皆泣莫能仰視密復曰幸不相棄當
共歸關中密雖無功諸君必富貴掾柳燮曰昔盆子歸

漢尚食均輸公與唐同族雖不共起然過隋歸路便無
西故唐不戰而據京師亦公功也密又謂伯當曰將軍
族重豈復與孤俱行哉伯當曰昔蕭何舉宗從漢今不
昆季盡行以爲媿豈公一失利輕去就哉雖隕首穴曾
所甘已左右感動遂來歸初密建號登壇疾風鼓其衣
幾仆及卽位狐鳴於旁惡之及將敗鞏數有回風發於
地激砂磔上屬天白日爲晦屯營羣鼠相銜尾西北度
洛經月不絕及入關兵尚二萬高祖使迎勞冠蓋相望
密大喜謂其徒曰吾所舉雖不就而恩結百姓山東連
城數百以吾故當盡歸國功不減寧融豈不以台司處
我及至拜光祿卿封邢國公殊怨望帝嘗呼之弟妻以
表妹獨孤氏後禮寢薄執政者又求賄滋不平因朝會
進食謂王伯當曰往在洛口嘗欲以崔君賢爲光祿不
意身自爲此未幾聞故所部將多不附世克者高祖詔
密以本兵就黎陽招撫故部曲經略東都伯當以左武
衛將軍爲密副馳驛東至稠桑驛有詔復召密密大懼
謀叛伯當止之不從乃曰士立義不以存亡易慮公顧
伯當厚願畢命以報今可同往死生以之然無益也乃
簡驍勇數十人衣婦人服戴幕離藏刀裙下詐爲家婢
妾者入桃林傳舍須臾變服出據其城掠畜產趨南山

而東馳告張善相以兵應已熊州副將盛彥師率步騎
伏陸渾縣南邢公峴之下密兵度橫出擊斬之年三十
七伯當俱死傳首京師時徐世勣尚為密保黎陽帝遣
使持密首往招世勣世勣表請收葬詔歸其尸乃發喪
具威儀三軍縞素以君禮葬黎陽山西南五里墳高七
仞密素得士哭多歐血者邴元真之降也世克以為行
臺僕射鎮滑州密故將杜才幹恨其背密備以兵歸之
斬取其首祭密冢已乃歸國

單雄信曹州濟陰人與翟讓友善能馬上用槍密軍中
號飛將偃師敗降世克為大將秦王圍東都雄信拒戰
槍幾及王徐世勣呵之曰秦王也遂退後東都平斬洛
渚上

祖君彥齊僕射孝徵子博學彊記屬辭贍速薛道衡嘗
薦之隋文帝帝曰是非殺斛律明月人兒邪朕無用之
煬帝立尤忌知名士遂調東都書佐檢校宿城令世謂
祖宿城負其才常鬱鬱思亂及為密草檄乃深斥王闕
密敗世克見之曰汝為賊罵國足未君彥曰跣客可使
刺由但愧不至耳世克令撲之既困卧樹下世克已自
欲盜隋中悔命醫許惠照往視之欲其蘇郎將王拔柱
曰弄筆生有餘罪乃蹙其心即死戮尸於偃師

贊曰或稱密似項羽非也羽興五年霸天下密運兵數十百戰不能取東都始玄感亂密首勸取關中及自立亦不能鼓而西宜其亡也然禮賢得士乃田橫徒歎賢陳涉遠矣噫使密不為叛其才雄亦不可容於時云

唐書卷八十四終

唐書卷八十五

王竇列傳第十

宋宋祁撰

皇明朝列大夫國子監祭酒臣蕭良有

承直郎司業臣葉向高等奉

勅重較刊

皇明朝列大夫國子監祭酒臣吳士元

承德郎司業仍加俸一級臣黃錦等奉

上重修

王世克字行滿祖西域胡號支頽禱後徙新豐死其妻與霸城人王粲為庶妻頽禱子收從之冒粲姓仕隋歷懷汴二州長史生世克豺聲卷髮忌刻深阻涉書傳喜兵法通龜策推步以蔭為左翊衛遷御府直長兵部員外郎從楊素北伐為幽州長史大業初為民部侍郎善占對習法政舞文上下人或辨駁世克以口舌緣飾衆

知其非亦不能屈也出爲江都贊治遷郡丞煬帝數南
幸世克善伺帝顏色阿意順旨性機巧飾臺沼陰奏遠
方珍物以媚帝帝愛昵之拜江都通守兼知宮監事世
克觀隋政方亂而江左浮剽易動乃陰結豪傑有繫獄
者皆撓法貸減以樹私恩楊玄感反吳人朱燮晉陵人
管崇起江南應之兵十餘萬隋將吐萬緒魚俱羅討之
不克世克以偏將募江都萬人頻擊破之每捷必歸功
於下虜獲盡推與士卒故人爭爲效由是功最多大業
十年齊賊孟讓轉寇諸郡至盱眙世克拒之保都梁山
列五壁不戰虜兵以示弱讓笑曰世克文法吏安知兵
吾今生縛之鼓行下江都矣時百姓皆入保野無所掠
讓衆餒又苦五壁閉道不得南卽分兵圍之世克數戰
陽不利走壁讓益驕數日稍分其下南略裁留兵足圍
壁世克知賊懈夜夷竈撤幕爲方陣外向毀垣旦而出
奮擊大破之讓以數十騎去斬首萬級虜十餘萬人煬
帝以世克有將帥略復委捕諸盜所向輒定會突厥圍
帝鴈門世克悉發江都兵赴難詐爲可喜事以邀聲譽
在軍蓬首垢面日夜悲泣不釋甲卧必席橐帝以爲忠
愈屬信之厭次賊格謙兵十餘萬屯豆子航太僕卿楊
義臣殺謙世克討其餘黨夷之進擊賊盧明月於南陽

俘係數萬還帝自持酒爲勞世克啓帝江淮良家女願
備後廷無繇進帝喜令閱端麗者以庫貲爲聘費不可
校署計簿云勅別用有司不敢聞具舟送東都宮會道
路剽奪使者苦之或沈舟亡去世克屏不奏李密逼東
都詔世克爲將軍以兵屯洛口大小百餘戰無大勝負
詔卽拜右翊衛將軍趣破賊十四年世克引軍與密戰
洛南有氣若城壓其營世克大敗衆幾盡走保河陽自
繫獄請罪於越王侗侗以書慰勉賜金帛安之召還洛
哀亡散得萬人屯含嘉城畏縮不敢出會江都弒逆羣
臣奉侗爲帝以世克爲吏部尚書封鄭國公宇文化及
擁兵北還侗聽內史令元文都盧楚等謀以重官畀李
密使討賊若化及破而密兵亦疲乘其弊可得志乃遣
使以太尉尚書令卽軍中拜密趣兵北討密稱臣奉制
引兵從化及黎陽戰勝來告衆大悅世克獨謂其下曰
文都等刀筆才必爲密禽且我軍與賊戰多殺其父子
兄弟一旦爲之下吾屬無類矣以此言激衆文都等聞
大懼侗欲以文都爲御史大夫世克不許曰嘗與公等
約左右僕射尚書令御史大夫留待勳舊今各欲得則
流競開矣何以共守文都憾焉潛與楚謀因世克入殿
伏甲殺之納言段達庸怯畏不果馳告世克世克夜以

兵襲含嘉門圍宮城右武衛大將軍皇甫無逸等遣將
費曜田閹拒戰太陽門曜敗世克入之無逸以單騎遁
收楚殺之時紫微宮尚閉世克扣門給伺曰元文都等
欲執陛下降李密臣不反誅反者耳段達執文都送世
克殺之世克悉遣腹心代衛士然後入謝曰文都楚無
狀規相屠戮臣急爲此非敢它伺與之盟進拜尚書左
僕射總督內外諸軍事乃去含嘉城居尚書省專宰朝
政以其兄世暉爲內史令居禁中子弟皆將兵分官吏
爲十頭以主軍政未幾李密破化及還屯金墉勁兵良
馬多死世克欲擊之恐士心未一乃謀以鬼動衆令德
陽門衛張永通言夢人謂己曰我周公能以兵助討密世
克白伺立祠洛旁使巫宣言周公令急擊密有大功不
然兵且疫世克下皆楚人信妖遂請戰乃簡精卒二萬
騎二千跨洛水爲三橋以度兵密軍偃師北山新破敵
有輕世克心不設壁壘世克夜遣二百騎蔽山伏因秣
馬葶食遲明薄之密陣未成伏兵上北原乘高馳下壓
其營縱焚廬落密衆大潰降其將張董仁陳智略進拔
偃師初密得世克兄世偉及子玄應於化及軍囚之至
是皆歸世克兵次洛口密長史酈元真司馬鄭虔象以
城降悉收美人寶貨而還密以數十騎跳奔於是世克

自爲太尉尚書令加黃門印綠綬綬以尚書省爲府置
官屬乃設三榜於府外其一求文學堪濟世務者其二
武幹絕衆推鋒陷陣者其一能治冤抑不申者繇是上
書陳事日數百皆慰勞省接雖吏卒必飾詞誘納而世
克素詭妄不能讎其語士大夫遂貳初殺文都欲詭衆
取信乃請事侗母劉太后爲假子至是加號聖感太后
散騎常侍崔德本曰此王莽文母何異乎後食侗前得
嘔疾疑見毒遂不復朝以將張績董濬衛宮城武德二
年矯侗詔假黃鉞相國總百揆封鄭王授九錫冕十有
二旒建天子旌旗金根車駕六馬備五時副車旄頭雲
罕舞八佾設宮縣出入警蹕術士桓法嗣自言能決讖
乃上孔子閉房記畫男子持一干驅羊狀因說世克曰
隋楊姓也於文干一爲王王處羊後大王代隋之符又
陳莊周人間世德克符二篇曰上下篇與大王名協明
受符命德被人間爲天子也世克喜曰天命也拜受之
以法嗣爲諫議大夫又羅取飛鳥書符命於帛繫鳥頸
緘之有彈捕得鳥而獻者亦拜官諷百官勸進時納言
蘇威老就第世克以威隋大臣有素望每表必署威名
使段達等脅侗曰天命不常今鄭王功德甚盛請揖讓
用堯舜故事侗怒曰天下者高祖天下若隋德未究此

言不可發必天命遂改尚何禪公非先帝舊臣乎朕何
賴達等流涕世克又詐曰天下未定須鎮以長君待天
下安則復子明辟四月矯伺策禪位幽伺於含涼殿猶
三讓遣諸將以兵清宮世克襲戎服法駕導鼓吹入宮
每歷一門從者必呼至東上閣更衣冕卽正殿僭位建
元開明國號鄭乃封兄世衡爲秦王世偉楚王世暉齊
王諸族屬以次封拜以子玄應爲皇太子玄恕爲漢王
世克每聽朝決政誨諭言語諄復百緒以示勤篤百司
奏事者聽受爲疲出輕騎無警蹕游歷衢肆行者但止
直徐謂百姓曰故時天子居九重在下之情無絲察與
克非貪位者本救時耳正若一州刺史事皆親覽當與
士人共議之恐門衛有禁無以盡通令止順天門外置
坐廳事又詔西朝堂聽冤訴東朝堂延諫者絲是章牘
填委觀省不暇後亦不能復出五月裴仁基與其子行
儼及宇文儒童崔德本等謀劫世克復立伺不克夷三
族六月鳩殺伺以絕衆望世克率衆東徇地至滑以兵
臨黎陽時黎陽爲竇建德守故建德亦破世克殷州以
報其役三年下書大赦築練兵臺於伊闕守將羅士信
豆盧達稍稍歸國世克顛下多背已乃峻誅暴禁以威
之戶一人逃家無少長皆坐父子兄弟夫婦許相告免

令伍伍相保一家叛舉伍誅樵牧出入皆爲限公私不
聊生遣臺省官督十二郡營田行者自謂仙去以宮城
爲大獄意所猜惡必收繫其人內家屬宮中或命將亦
質其孥乃遣旣而囚質且萬口食不足餓死者日數十
七月高祖詔秦王率兵攻之至新安屯保多下敗世克
於慈澗城八月王陳兵青城宮世克悉精兵來拒隔澗
言曰隋失其國天下分崩長安洛陽各有分地吾常自
守不敢西顧熊穀二州在度內不取敦鄰好也今王遠
涉吾地越三嶠饋糧千里勤師遠出將何求王曰四海
之人皆承唐正朔獨公迷不復東都士民來請師陛下
重違我是以來公若降官買可保必拒我勉之無多言
世克約割地不許潁州總管田瓚請舉山南二十五郡
歸九月王君廓進拔轅轅徇地至管城河南州縣以次
降定始竇建德與世克隙至是建德遣使結好并陳赴
援意世克遣兄子琬內史令長孫安世報且乞師四年
二月青城宮守將以宮降王遣保之世克張兵出方諸
門臨穀水以戰王陣北却令屈突通步士五千踰水擊
之兵接王以騎決戰世克排積兵殊死鬪自辰及午乃
潰俘斬八千人王傳城塹而守之世克糧且盡人相食
至以水汨泥去礫取浮土糝米屑爲餅民病腫股弱相

籍倚道上其尚書郎盧君業郭子高等皆餓死御史大夫鄭頽正爲浮屠世克惡其言殺之然氣竭但嬰城須建德之救五月王禽建德并獲王琬長孫安世俘示東都城下且遣安世入言敗狀世克惶惑將突圍出保襄漢謀於諸將皆不答遂率將吏降軍門王受之以屬吏陳兵入城發府庫資將士其黃門侍郎薛德音以移檄媢逆崔弘丹造弩多傷上前誅之又收段達楊汪孟孝義單雄信楊公卿郭士衡郭什柱董濬張童仁朱粲王德仁等斬洛渚上以世克歸長安高祖數其罪世克曰計臣罪不容誅但秦王許臣以不死乃赦爲庶人與其族徙于蜀將行爲羽林將軍獨孤脩德所殺初脩德父機嘗仕越王侗世克旣篡謀歸唐爲所屠者也高祖免脩德官子玄應兄世偉在道謀反伏誅世克篡凡三年滅

竇建德貝州漳南人世爲農自言漢景帝太后父安成侯克之苗裔材力絕人少重然許喜俠節鄉人喪親貧無以葬建德方耕聞之太息遽解牛與給喪事鄉黨異之盜夜劫其家建德立戶下盜入擊三人死餘不敢進請其尸建德曰可投繩係取之盜投繩建德乃自縊使盜曳出躍起捉刀復殺數人繇是益知名爲里長犯法

亡會赦歸久之父卒里中送葬千餘人所贈予皆讓不受隋大業七年募兵伐遼東建德補隊長方如軍會邑人孫安祖盜羊爲縣令捕劾笞辱安祖刺殺令亡抵建德建德陰舍之時山東饑羣盜起乃謀曰徃文皇帝時天下盛彊發百萬衆伐遼東猶爲所敗今水潦爲災民力凋敝主上不是恤而親駕臨遠且徃歲西征十不一返今劊夷未平又重發兵人情危駭易以搖動丈夫不死當建功于世渠爲亡命虜乎我聞高雞泊廣袤數百里葭亂阻與可以違難承間竊山推埋掠伎足以自資因得聚豪傑且觀時變以就大計安祖然之建德爲招亡兵及民無產者數百使安祖率之入高雞爲盜安祖號摸羊公時鄆人張金稱亦結衆萬餘依河渚間脩人高士達兵千餘屯清河鄙上諸盜徃來漳南者多剽殺人焚鄉聚獨不入建德間郡縣意建德與賊通捕族其家建德至河間聞家屬滅卽率麾下二百人亡歸士達士達自稱東海公以建德爲司兵安祖爲金稱所殺其下數千人歸建德衆益盛至萬人猶保高雞泊然傾身接物其執苦與士卒均由是能致人死力十二年涿郡通守郭絢率兵萬人討士達士達自以智略不及建德乃推爲軍司馬以兵屬焉建德旣統衆思用奇屢伏羣

盜乃請士達守輜重自以精兵七千迎絢詐爲亡狀士
達取所虜陽言建德妻子殺之建德遺絢書約降請前
驅執賊自效絢信之引兵從建德至長河界欲與盟兵
懈不設備建德襲殺其軍數千人獲馬千匹絢以數十
騎去追斬於平原獻首士達威振山東隨遣太僕卿楊
義臣討破張金稱於清河殘黨畏誅復屯嘯歸建德義
臣乘勝欲遂入高鷄泊窮剗根穴建德謂士達曰隋善
將獨義臣耳新破金稱其鋒不可當宜引兵避之彼欲
戰不得軍老食乏乘之可有功士達不納留建德守壁
身將兵逆戰置酒享士建德聞曰東海公未捷遽自矜
大禍至不日矣隋兵勝必長驅而來吾不能獨支乃留
衆保壁帥銳士據險待後五日義臣斬士達於陣追北
薄壘守兵潰建德不能軍以百餘騎走饒陽饒陽無備
因取之義臣已殺士達謂餘黨不足憂引去故建德得
還平原收士達士死齎葬焉爲士達發喪軍皆縞素招
潰卒得數千人軍復振自稱將軍初佗盜得隋官及士
人必殺之唯建德恩遇甚備引故饒陽長宋正本爲客
尊任之參決軍議隋郡縣吏多以地歸之勢益張兵至
十餘萬上谷賊王須拔自號漫天王以兵略幽州戰死
其下魏刀兒號歷山飛壁深澤衆十萬建德以計襲取

之并有其地十三年正月築壇場於河間樂壽自立爲
長樂王十四年五月更號夏王建元丁丑署官屬分治
郡縣七月隋右翊衛將軍薛世雄督兵三萬討之屯河
間七里并建德以勁兵伏旁澤中悉拔諸城僞遁世雄
以爲畏稍弛備建德率敢死士千人襲之會大霧晝冥
跬不可視隋軍驚遂潰相騰藉死者如丘世雄引數百
騎亡去盡得其衆獲河間丞王琮勞遣之琮復嬰城建
德進攻未下而河間食盡聞煬帝遇弑琮率吏發喪乘
城大臨建德遣使入弔琮因請降建德爲退舍飭饌具
琮率郡屬素服面縛軍門建德親釋徽纒與言隋之二
琮伏哭極哀建德亦爲泣麾下或言河間久拒守多殺
士今力窮而下請烹之建德曰琮誼士也吾方旌擢以
勵事君者且往爲盜可妄殺人今將安百姓定天下而
害忠臣乎卽令其軍曰與琮隙者敢輒搖罪三族乃授
琮瀛州刺史始都樂壽號金城宮備百官準開皇故事
冬至大會僚吏有五大鳥集其宮羣鳥從之又宗城人
獻玄圭一景城丞孔德紹曰昔天以是授禹今瑞與之
侔國宜稱夏建德然之改元五鳳以德紹爲內史侍郎
武德元年宇文文化及至魏縣建德謂其納言宋正本及
德紹曰吾隋民也隋吾君也今化及殺之大逆不道乃

吾讎欲爲天下誅之何如正本等曰大王奮布衣起漳南隋之列城莫不爭附者以能杖順扶義安四方也化及爲隋姻里倚之不疑今我君而移其國讎不共天請鼓行執其罪建德善之卽引兵討化及連戰破之化及保聊城乃縱撞車機石四面乘城拔之建德入先謁蕭皇后語稱臣執宇文智及楊士覽元武達許弘仁孟景等召隋文武官共臨斬之梟首轅門囚化及并其子載以檻車至大陸縣斬之建德性約素不喜食肉飯脫粟加蔬具妻曹未嘗衣紈綺及爲王妾侍裁十數每下城破敵貨寶並散賚將士至是得隋宮人尚千數悉放去其文武驍果尚萬餘各聽所之乃以誅化及報越王侗侗封之夏王遂號大夏以隋黃門侍郎裴矩爲尚書右僕射兵部侍郎崔君肅爲侍中少府令何稠爲工部尚書餘隨才署職委以政事有願徃關中及東都者悉聽不留仍給道里費以兵護出于境二年陷邢趙滄三州復陷冀州執刺史麴稜赦之復以爲刺史八月陷洛州虜刺史袁子幹遂遷都焉更號萬春宮使人如灌津祠先墓置守冢三十家又遣使朝侗因與王世克結歡北聘突厥士馬益精雄俄而世克廢侗乃絕之始建天子旌旗出入警蹕書稱詔追諡隋煬帝爲閔帝以齊王暕

子政道爲鄖公義成公主在突厥遣使迎蕭后建德自將千餘騎送之并獻化及首未幾連突厥侵相州刺史呂珉死之進攻衛州執河北大使淮安王神通同安長公主黎陽守將李世勣釋之復使世勣守黎陽館王公主饋以客禮滑州刺史王軌爲奴所殺奴以首奔建德建德曰奴殺主大逆納之不可不賞賞逆則廢教將焉用爲命斬奴而返軌首滑人德之遂降齊濟二州亦降兗賊徐圓朗聞風送款三年世勣自拔歸國吏白建德誅其父建德曰世勣唐臣不忘其主忠也父何罪釋不問高祖遣使脩好建德卽以公主等歸京師嘗執趙州

刺史張志昂邢州刺史陳君賓大使張道源等將殺之國子祭酒凌敬諫曰夫犬吠非其主彼悉力堅守以窮就禽伏節士也今殺之無以勸建德怒曰我傳其城猶不下勞費士旅何可赦敬曰王之大將高士興抗羅藝於易南兵未交士興卽降王以爲可乎建德悟卽釋之然其大將王伏寶數持兵功略在諸帥上或纔其反建德殺之伏寶臨死呼曰我無罪王何信讒自刈左右手乎後戰數不利九月建德自帥師圍幽州爲羅藝所敗藝乘勝襲其營建德陣營中填塹而出敗藝衆進薄其城不能拔乃還濟陰賊孟海公兵三萬據周橋城以掠

河南建德自擊之會秦王伐東都其中書舍人劉斌獻
說曰唐據關內鄭王河南夏有冀方此鼎足相持勢也
今唐悉兵臨鄭出入二年鄭人日蹙二國兵不解唐疆
鄭弱勢必舉鄭鄭滅則大夏有齒寒之憂爲大王計莫
若援鄭使鄭抗其內我攻其外唐之兵必卻唐卻而鄭
完然後徐觀其變鄭若可圖因而取之并二國兵乘唐
師老長驅而西關中可遂有也建德曰善乃遣使聘世
克與連和會世克亦自乞師卽令其臣李大師魏處繪
來朝請解鄭圍秦王留之不答四年建德克周橋虜海
公留其將范願戍之悉發海公徐圓朗之衆并兵號三
十萬救世克至滑州世克行臺僕射韓弘開城納之建
德進逼元梁管三州皆陷遂屯滎陽運糧汴河西上舟
相屬不絕壁成臯東原築營板渚遣使與世克約期又
遣秦王以書三月王進據虎牢翌日以騎五百覘建德
營設伏道側獨以數騎去賊營二里覺賊出騎追之王
漸卻誘至伏所卒起奮擊賊騎驚馬引去追斬三百級獲
其將殷秋石瓚乃報建德以書建德失二將又聞唐兵
精得書猶豫頓六十日不敢西時世克弟世辯爲徐州
行臺亦遣將郭士衡兵數千人從建德王遣王君廓以
輕騎抄其饗執賊大將張清特建德懼人情攜駭其諸

將又新破海公掠獲盈給日夜思歸凌敬說建德曰今唐以重兵圍東都守虎牢我若悉兵濟河取懷州河陽以重將戍之然後鳴鼓建旗踰太行入上黨傳檄旁郡進壺口以駭蒲津收河東地此上策也且有二利乘虛擣境師有萬全也拓土得衆二也鄭圍自解三也建德將從之而王琬長孫安世日請兵西每言必流涕又陰賚金玉啗諸將以撓其謀衆乃曰凌敬書生豈知戰建德乃謝曰今士心銳天贊我也師將大捷方用衆議不得如公言敬固爭建德怒命扶出其妻諫曰祭酒計甚善王盍用之夫自滏口道乘虛之虛連營漸進以取

山北因招突厥西抄關中唐必還師自救鄭難紓矣今頓兵虎牢下徒自苦恐無功建德曰此非女子所知且鄭朝暮待吾來既許之豈可見難而退且示天下不信五月建德自板渚出爲陣西薄汜南屬鵠山亘二十里鼓而前郭士衡爲游兵秦王登虎牢城望其軍按甲不戰曰賊起山東未嘗見大敵今度險士囂令不肅也逼城而陣有輕我心待其饑破之果矣日中建德士皆坐列渴爭飲意益怠王麾軍先登騎怒塵大漲乃率史大柰秦叔寶纏摩幟馳出賊陣後建德軍顧而驚遂大潰建德被重創竄牛口谷車騎將軍白士讓楊武威獲之

傳而西斬長安市年四十九初其軍有謠曰豆入牛口
勢不得久至是果敗建德妻與其左僕射齊善行以騎
數百遁還洛州餘黨欲立其養子為主善行曰夏王奄
定河朔號為威彊今一出不復非天命有歸哉不如委
心請命無為塗炭生民也遂分府庫散給將士令各解
去善行乃與右僕射裴矩行臺曹旦率官屬及建德妻
奉山東地并傳國八璽來降建德起兵至滅凡六年
贊曰煬帝失德天醜其為生人顛辜羣盜乘之如蝟毛
而奮其劇者若李密因黎陽蕭銑始江陵竇建德連河
北王世克舉東都皆磨牙搖毒以相噬螫其間亦假仁
義禮賢才因之擅王僭帝所謂盜亦有道者本夫孽氣
腥熖所以亡隋觸唐明德折比不支禍極凶殫乃就戮
夷宜哉

唐書卷八十五終

唐書卷八十五

列傳

五

